



14577

14577

III

Mog. St. D.

P


Gonraga

Maurokowi Valent. Joann. Corona radiata
reginalium virtutum gloriosis splendoribus
reducens.

PANEG. et VITAE

Polon. Fol.

№ 628



C O R O N A
R A D I A T A

Reginalium Virtutum gloriosis
Splendoribus relucens,

P E R E N N I M O N V M E N T O,

S E R E N I S S I M Æ D O M I N Æ,

L V D O V I C Æ

M A R I Æ G O N Z A G Æ

Poloniarum & Sueciæ Reginaë,

Cliuiæ, Niuerniæ Ducis, Principis

Mantuæ, Montis ferrati &c. &c. &c.

superimposita.

et ad Æternam,

Serenissimæ Virtutum Memoriam,

I N T E R I V S T A

Sepulchralis Pompa,

P E R

M. VALENTINVM IOANNEM MAZVRKOWIC,

Vniuersitatis Cracou: inter Collegas Minores Professore.

pio lugubriq; cultu

immortalitati

P R Æ S E N T A T A.

ANNO MORTALIS DEI, M.DC.LXVII.

X. Calend. Octobr.

C R A C O V I Æ,

Ex Officina SCHEDELIANA, S.R.M. Typogr.

In Stemma Illustrissimæ Domûs
DONHOFFIANÆ.



Stemmata sint alijs tumidas tollentia cristas,
Ornat DONHOFFOS hic generosus Aper.
Nam quoties vel Prisca Fides, vel publica tristem
Res metuit casum, mæstaq; poscit opem.
Emicat ante alios victrix DONHOFFIA virtus,
Nullos tunc ignes, nulla pericla timens.
Hinc quia magnanimi subit ardua pectoris ausu,
Fulmineus sibi pro Stemmate cessit Aper.

BIBLIOTH. UNIV.



WAGELLONICAE

44574 III

Illustrissimo ac Reuerendissimo Domino,

**D. ALEXANDRO
DONHOF,**

S. R. I. P R I N C I P I.

ABBATIAE ANDREOVIENSIS,

Administratori Perpetuo, S. R. M. SECRETARIO, &C.

Domino & Patrono suo Amplissimo Auctor S. & P.



Aгна & firmissima vincula sunt, quibus omnes Principibus obligamur ILLUSTRISIME & REVERENDISIME DOMINE. Principes à Deo datos esse, qui erga genus humanum vice suâ fungantur; Ministros esse Dei, ad curam ac salutem hominum, ut bona, quæ Deus illis largitur, partim distribuunt, partim seruent; Pastores esse populorum, Tutores status publici, Curatores salutis alienæ, immò Parentes publicos, Patres Patriæ, cælestium ingeniorum, æterna elogia, iam pridem nuncupârunt. Gloriosa elogia, & quæ sola illorum coarguant malevolentiam, conuincant proteruiam, qui dicta omnia Principum inquirere, ventilare, producere, & paucos aliquos nœuos adnotare malunt; quàm illorum continuis præconijs dilaudare bonitatem. Atqui cùm bene calculum ponimus; si non alia nos virtus, parentibus obstringit; nisi illa quæ ex vicino, cum Summo Numine agit, & supra omnes virtutes, altius eminet, sanctissimum humani pectoris ornamentum pietas; non alio etiam cultu, optimos Principes venerari decet; quàm pietatis: immò tantò æquius, quantò publicæ necessitudines priuatis antecellunt. Cogitavi ego hæc sedulo, & cùm imbecillitatem omnem librâsem meam, præter has literulas, fidissimas vitæ meæ altrices, nihil potui inuenire, quod reuerentiæ in Principes contestandæ gratiâ, consecrare conferreque possem. Itaque cùm nitentes ubique, & lucentes bonitatis, benignitatis, cæterarumque virtutum Serenissimæ Reginæ LVDOVICÆ MARIÆ GONZAGÆ intuerer radios, in argumentum debiti cultus Coronam ex eis contexui Radiatam. Sed ut rarissimè videmus calum sine nube, ignem sine fumo; sic rarissimè scripta in lucem exeunt publicam: quin ea statim umbra maligni liuoris sequatur; vel æterni turbines in deterius omnia interpretantium hominum nigræ mentis inquietent. Quare ut præsidium patrocini-umque inueniam, ad Te ILLUSTRISIME Dñe confugio, & in sinu tuo, id quidquid est lucubrationis pono meæ. Qui sis ex publicâ iam pridem famâ didici, quæ maximâ humanitate illustres virtutes Tuas, assidujs præconijs extollere non desistit. Ut illibatam silentio transmittam Illustrissimam Familiam Tuam, secundam Viris maximis, pollentem opibus, splendentem honoribus, cognationis vel affinitatis vinculo, primarijs in Republica Familijs alligatam: Parens Tuus

145775

omnibus seculis admirandus, GASPAR DONHOFF, Palatinus Siradiensis, vel ipso nomine in virtutum omnium exemplum venit, qui vel unicus Familiam Vestram illustrare poterat, nisi illustrissimam inuenisset. Singula tanti Viri decora, quis possit breuiter aestimare, sed vel enarrare? Enituit ille in Serenissimos REGES, Rempublicamq; Polonam, fide, auctoritate, liberalitate, constantia, prudentia, magnanimitate, rerum agendarum dexteritate. Enituerunt etiam in eum Serenissimi REGES, SIGISMUNDVS III. & VLADISLAVS IV. grande uterq; togata, armataq; prudentie miraculum, propensione, gratia, benignitate, suumq; in eum affectum, amplissimis in eum congestis honoribus, sciri voluerunt. Quorum hic etiam splendidissimo illi negotio, quo Serenissimam CÆCILIAM RENATAM, FERDINANDI II. Augustissimi Rom: Imperatoris Filiam, in sacrum sibi Coniugium deposcebat; eum potissimum delegit Pronubum, & Paranympum; securus celsurum ex voto publico Orbis Christiani, quidquid DONHOFFII prudentia fuisset stabilitum. En qualis quantaq; Tua felicitas, à tali Parente prodisse, qui in se absolutam Magni Senatoris ideam expressit, & in compendium vite sue, omnes Heroici pectoris contraxit dotes. Sed in Te quoq; redundant istae laudes, non satis arbitrantem, summum fuisse Parentem Tuum, nisi pari Te virtute gloria consignes. Qui Te, qui Tuas virtutes intuetur, videt in Te spirare Illustrissimi Parentis viam virtutum effigiem, & exprimi quidquid ille gessit. Eadem in Te relucet prudentia, cultissimarum Nationum lustratione, limata & polita. Eadem magnanimitas, grauitas, auctoritas, in publicis priuatissq; actionibus spectata. Eadem fides, solertia, industria, eloquentia, nostrae Poloniae multis in occasionibus; Orbi etiam Europaeo, in illa Legatione Tua, pro Serenissimo Nostro IOANNE CASIMIRO ad Inuictissimum FERDINANDVM III. grandi immortalis Tuae gloria incremento probata, in qua Tu Legatione sauciū Augustissimi Parentis pectus, ob immaturum FERDINANDI IV. primogeniti Filij, Hungariae & Bohemiae Regis occasum, gratissimo illo lepore mellitae dictionis, & eleganti morum venustate mirè recreasti, releuasti. Omitto alias praestantissimae Naturae dotes, candorem, doctrinam, modestiam, humanitatem, continentiam, pietatem, quia cum in omnium oculos statim incurrant, copiosi sermonis praconium non requirunt. Hisce itaq; de causis ex ambire Patrociniij Tui fauorem volui; & simul venerari, nobilitatis, virtutis, dignitatis Tuae genium, ratus à tantà luce crepusculum tenuis ingenij mei, etiam si quae fortè inualescerent caligines improborum hominum, illustrandum. Suscipies pro innata benignitate Tuā, & pro singulari prudentia putabis ad Te, qui nobilissima corporis Politici portio es, laudes Serenissimae Reginae, tanquam augustissimi capitis pertinere. Ego in reliqua vita mea, vota Supremo Numini nuncupabo, vt Te diu incolumem, maximorum honorum fastigia, per prudentiae & compositae vitae gradus, felici passu emetiri patiat, ad Ecclesiae suae, Reip. addam etiā Vniuersitatis nostrae, incrementum. Cuius quanti facias sollicitam in educandā Nobilissimā Iuuentute diligentia, abunde nuper declarasti, cum eius institutioni Illustrem Nepotem, SIGISMUNDVM VICTOREM DONHOFF credidisti, Iuuenem in quo virtus & modestia, probitas, & elegantia, indoles & industria, festinata celeritate, ad publicum Patriae solatium, adolescunt.



CORONA RADIATA.



Vantum Patriæ nostræ, sic inflictum vulnus, luctuoso Serenissimæ REGINÆ LVDOVICÆ MARIAE GONZAGÆ occasu: ille tantum ignorat, qui omnem deposuit ex animo recordationem, grauium Patriæ nostræ ærumnarum, quibus tot annis, ab inimicâ Fortunâ, crudeliter mulctata; & de culmine beatæ pacis, in ipsum, miseriarum, & bellorum detrusa præcipitium; neq; lubricum retinere valens gradum; omne penitus, pristinae simulachrum, deperdidit dignitatis. Communes Patriæ calamitates, tot nefarias hostium in nos molitiones, tot populorum strages, tot incendia Villarum, tot direptiones Oppidorum & phanorum, tot præstantium Reipublicæ Ciuium, dolendos occasus; hoc tamen unico, pensabamus nobis solatio: quod mitissimos nobis Principes, benigna fata conseruabant; quorum paternâ prouidentiâ regeremur; quorum in nos benignitate, curâ, vigilantia, tanta malorum in nos vndiq; detonans procella; tot minæ & fulmina Fortunæ lenirentur. Ecce verò nihil his mitigata, vel placata, feralis Clotho, effert atrocissimam bipennem, infligit mortiferum ictum nostræ desideratissimæ Matri, geminat crudele vulnus, refricat vtcunq; sanatam cicatricem; & nihil tale sperantibus nobis, surripit ex oculis illam, in cuius vitâ, continebatur vita nostra, Serenissimam Ludouicam. Heu quot in vno nomine damna! quot in vnâ morte clades! quot in vno infortunio calamitates! Cecidit enim nobis optima Princeps, non arcto aliquo tramite, ad veræ laudis contendens culmen; sed rectissimis, latissimis itineribus, & plusquam humano passu, ad duraturam nominis memoriam progrediens: & pari nexu, vitam & virtutem, per continua momenta iungens. Occidit Regni nostri delictum, populorum voluptas, Gallicæ gentis gloria, labentium rerum columna, Christiani Orbis solatium, Ecclesiæ desiderium, humaniorum omnium affectuum Cynosura. Extincta est Ludouica illa, quæ in se laudabiles veterum Heroinarum renouabat dotes, dum caelestibus dotibus, supra humana omnia scandens altiùs, animorum libertatem, in sui amorem, suauissimè rapiebat. Occubuit Ludouica illa, Regnorum

gnorum nostrorum Gemma, Decus, & ornamentum singulare, quæ modestiam in compitis, mel in verbis, gratias in aspectu, oraculum in consilijs, in factis exemplum præferebat: ad quam cumulandam, atq; ornandam, quæcunq; aut Natura hominibus, aut Fortuna largiri solet; omnia, singulari quadam liberalitate, consenserunt. Merito ergo omnium oculi, humentibus lachrymarum guttis irrigantur; merito lamentabili comploratione tanta iactura defletur; merito omnes anguli, crebris gemitibus circumsonant; merito luctus vi doloris expressus, erumpit ex aulâ: & postquam obuios acerbitate nuntij confudit vultus, anxietatem atq; solitudinem animorum pandit: & in ipsa dolentium viscera, læuissimè debacchatur. Merito omnium erectæ spes, tristi desperatione deiectæ; omnium spiritus, vnus exspiratione interclusus; omnium vita, vnus morte iugulata. Atq; adeo hoc tantò magis, tristi solitudine percussis mentibus, est indulgendum, quod non ita optimos Principes, velut præcipitatum in occasum Solem, similibus nobis ortus reuehit, & in hoc pulcherrimo honoris cælo ponit: sed vsq; adeo rarissimus est talium prouentus, qui exemplo, qui legibus, fluentes diurnâ corruptelâ, sæculi mores corrigant: qui se à populi vilitate, non Fortunæ tantum opulentis muneribus; sed etiam diuite Prudentiæ, & virtutis censu tollant sublimiùs: qui quasi quædam benigna Numina, magnitudinem suam, felicitate subditorum velint æstimare: vt crediderim immerito vanitatis arguendum, quisquis polliceretur, bonos omnes Principes, in vnâ Pyrrhi gemmâ se sculpturum. Quis ergo seueriori censurâ iustissimum dolorem nostrum castigabit, aut gemitibus nostris succensebit grauius: si Serenissimi nostri syderis occasum, squalentibus prosequimur tenebris, & amicissimo funeri, tristes damus inferias: quando scimus, quid amiserimus; quid habituri simus, an aliquando simile visuri, probatissimarum Reginarum exemplar, ignoramus. Ac profecto, si Serenissima defuncta, perenne à nobis lachrymarum tributum exigeret; cuperemus omnes, cum Niobe, in sudantia marmora verti, vt sic perperuis madentes lymphis, eius tumulo adstaremus: vel cum Heliadibus, humentes ex oculis destillare latices, vt ij in pretiosum concrecentes electrum, nobile nobis suggererent monumentum, in quo vniuersi orbis notitiam meritæ, corporis eius exuiæ conderentur. Quid enim fuit illâ, per totam vitam laboriosius? quid magis anxium, sollicitum de Republica? quæ, cum ab initio imperij sui, bona, fortunaq; suas omnes in communionem Reipublicæ nostræ contulisset; & modici quiete temporis, aureo VLADISLAI IV æuo, fuisset vsa; breui post, omnibus belli impetu percussis, atq; prostratis; omnibus ornamentis dignitatis, & præsidij, amissis ac deperditis; totum vitæ cursum, in his gloriosis laboribus conficiebat; huc referebat animum, & deriuabat curas, & contentiones suas; vt & quæ iacebant, in pristinum locum reuocaret; & quæ

& quæ diffleebant, optimis legibus vinciret; & quæ fuerant diuexata, ac direpta, componeret; & quæ perierant, restitueret; & quæ fuerant conuersa, atq; perturbata, in solido collocaret. Quibus pro tantis laboribus, an non deceret copioso fletu, & manantibus lachrymis, æternum pios eius inspergi cineres; & per immodica lamenta, certissima nostri in eam amoris indicia declarari? An non æquissimum esset, frigida eius ossa, calentibus hisce fluentis, perpetuò irrigari. Enimuerò Serenissima Regina, tot perfuncta curis, tot liberata molestijs, tot exsoluta difficultatibus, à tantâ varietate casuum expedita, in diuinioris cuiusdam vitæ, confortium est admissa. Intrauit dulcissimam illam Patriam, certis æternisq; legibus gubernatam, in qua, non videre est flagrantem bello Regionem, non ardentem inuidiâ populos, non exilia, innocentum, non acerbas subditorum fugas, non cædes optimorum, caput, non deniq; deuastatas à funesti belli flammis, eas ciuitates: ad quas ipsa florentissimas præstandas, omnibus studijs, & conatibus incubuisset. Excepit illam alia forma rerum, & in vastissima illa spatia immisam, nihil iam humile, vel pusillum delectat: sed pulcherrimum Diuinorum spectaculum, & perpetuæ, dulcis detinet contemplatio. Peruenit post diuturnâ naufragia, & fatorum decumanas procellas, in securissimum portum, ubi tutò licet despicere, mutuos furentium concursus; & tædio malorum, sæpius inuocatam mortem, & possessionem exclusam pacis; & adultam maturitatem sceleris; & quandam malitiæ senectutem. Nostrium ergò, nostrum id est malum, quòd iam eius bonitate non permittitur nobis frui, quæ in vitâ, hoc vnicum, visa est egisse; vt omnium lachrymas, efficaci solatio; inopiam, præsentiope; mala, largâ beneficentiâ propulsaret. Quod quoniam ad domesticam nostram calamitatem referendum est: feramus illud, forti animo: ne, ad mortis necessitatem, à cuius lege nemo exceptus, imperitiæ etiam dedecus; quod humanæ nobis, inducat obliuionem conditionis, adiungamus. Interea, ne non satis grato animo, in defunctam videamur; meritis eam laudationibus, & honorificâ recordatione: (quandoquidem hoc solum est præmium, quod eximijs magnorum virtutibus, à gratâ posteritate rependitur,) prosequamur. Mihi certè, sicut cum eleganti Plinio, pulchrum visum est; non pati occidere eos, quibus æternitas debeatur: resq; eorum dignissimas, ad posteritatis memoriam conseruare: sic non indecorum fortassis fuerit, officioso vmbatilis Suadæ obsequio, idem experiri. Erexit ergò huic fini, omnis laudis feracissima antiquitas, Columnas triumphales suis Semiramidibus: excitavit aras Liuijs: defixerit tabulas Arrijs: flexerit arcus Pulcherijs: alias præstantissimas Heröinas, diuerso genere cultus honorârunt: ego ad commendationis argumentum, ne à Serenissimæ Reginæ viuentis Honoribus recedam, Coronam ei fabricabo Radiatam. Quæ quòd facilius, mansuram eius, omnium animis, insinuet recordationem,

& per tristes, sepulchralis rogi tenebras, indicium sui, clarissimo iubare faciat, augustis eam virtutum defunctæ radijs illustrabo. Si forte materies transcendet opus, & tantarum sub mole rerum, fatigatus succumbam Panegyrista; ad benignum spectatoris iudicium prouocabo: ut quicquid hîc præstitum aduertet; submissionis potius, & debitæ in Serenissimam Reginalem Maiestatem venerationis, Lytron putet; quàm florentis eloquij pensionem.

Pincipum Heröicis mentibus, lucidos honores deberi: nihilq; ita conuenire; sicut triumphales splendores, è Capitolio cælesti deriuatos; venerabile anteaucti sæculi præiudicium, liquidis euincit documentis. Exquirat quisquis inter assensum, & dissensionem medius, pronâ non vult, in hanc sententiam, voluntate ferri, orbis vniuersi iudicium: mittat in præteritum, diligentiam curiosam: lustret retrogradam sæculorum memoriam: discutiat venerandæ monumenta vetustatis: inueniet inter ambitiosa populorum vota, nihil ab ijs potuisse fingi præclariùs: quàm ut suos Principes, splendidis Honorum coronamentis exornarent. Nimirum prudens, quantum in illâ caligine fieri potuit, antiquitas: cum videret Regum dignitatem, nihil aliud esse, quàm Monarchiæ cælestis expressiorem, in qua se Suprema Diuinitas nitidis depingit coloribus: cum cerneret istam potestatem, radium esse lucis illius, quâ **D**eu*s* in summo & imò complet, exhilarat, moderatur omnia: non alio etiam, quàm Diuino honore, eos sibi semper colendos iudicabat. Ergò sicut Solem, ad cuius exortum, omnis natura reu-
rescit, & mirâ varietate, sua ubiq; dispensat dóna, quia vel principale Mundi Numen, vanâ sibi credulitate persuadebat; vel præcipuum Dei instrumentum, per quod, in tot labentium sæculorum cursu, mundum inexhaustis vicibus recreat, conspiciebat: duodecim idcirco auratis radijs coronabat: quod is duodecim signa Zodiaci, lucido tramite percurrentes; immò quod totidem Menses, & horas conficiens, stupendas rerum conuersiones, tam in superiori, quàm in inferiori gignit orbe: ita Principum diademata, tot radijs, ex aureâ laminâ surgentibus, & spargentibus se se; moxq; in apicem reducto gyro coeuntibus, in acumen se volebat efferre: ut salubre Principibus tacitè consilium subministraret: Principes, velut pulcherrima sydera, in altissimo honoris firmamento, Diuinâ manu esse collocatos; qui irrequieto omnium Regionum spatia percurrentes cursu, vigorem sanitatemq; sibi subiectis, impertiantur. Atq; ego de viuentium honoribus loquor; ampliùs aliquid sibi, eadem perspicax virtutum obseruatrix permisit, in eis honorandis, quos ab oculis mortalium, amolita natura effert. Tum enim non tantum magnis Heroibus, exquisito parentabat apparatu; non tantum per odores, in magnificas cumulos pyras, eosdem venerabatur; non tantum per aquilas è rogo erumpentes consecrabat; verum etiam ma-
nus

nus eorum trifulcis fulminibus, capita radijs, & astris exornabat; & mediâ inter Deos sede collocabat. Ita Herculem, Liberum, Pollucem, Castorem in Græcia; Iulium, Augustum, Neruam, Traianum, Romæ; Belum, Ninum, Semiramidem, in Asia; Osiridem in Ægypto; hæc nimium reuerens suorum Principum vetustas, in cælum duxit, Diuinos illis honores nuncupauit: nec exiguâ tantum thuris impensâ; sed cæsis etiam victimis, densisq; pecudum stragibus honorauit. Ita eximijs laudatissimarum Matronarum virtutibus, (ne à tanto honore, sexum putemus exclusum muliebrem) hanc quoq; gratiam rependit, vt quoniam in vitâ, ad instar splendentium syderum, omnes nebulas calamitatum, in Rebus publicis abstergebant, suarumq; lumine virtutum, mundo succurrebant laboranti: post fata etiam, habitu Dearum, in erectis sibi templis, stellis coronatæ starent; & splendidis cælestibus ornamentis rutilarent. Quo in genere nimij & prodigi cultus; quamuis antiquitatem, ab impiâ nequeam superstitione excusare; vt eam tamen appellem imprudentem, ratio non occurrit. Nam præterquàm quòd non nemo apud elegantem Curtium loquitur: Maiestas imperij salutis est tutela. prudentissimè & præclarissimè mihi Ecphantès libro de Regno videtur decreuisse. In terrâ (verba eius sunt) optimus quidem inter cæteras animantes est Homo: Diuinissimus autem Rex. Similis quidem corpore, reliquis hominibus; sed cælestem referens auctoritate virtutem; Deiq; imaginem repræsentans, qui eum mirificè produxit, Archetypo vsus seipso. Animosè proinde ad Coronam Radiatam, descendendo contexendam: quòd vnâ mecum omnes prudentiæ testes recognoscant, in Principibus, præter ea, quæ sibi sunt cum cæteris hominibus communia: esse aliquid excellentius, diuinus, augustius; ac propterea maiori studio ad posteritatis memoriam transmittendum. Transmittentur à me quanquam pusillo & imbelli Oratore, virtutes tuæ, magnum Reginarum decus, Serenissima **LVDOVICA**. Quidquid Pallas mea immortale habuit, id in funere tuo declarare cupiet, & æternum duraturis splendoribus, perenne tuum illustrabit monumentum. Liuiam olim Augustam, habitu Iunonis, Claudius Imperator; Drusillam, habitu Veneris Caius; redimitas stellatis Coronis consecrarunt. Faustina Antonini Coniugem, Planetarum heptade cinctam, in cælum euolantem; quasi pari cum stellis passu, lacteas cæli vias peragrasset, prisci nobis nummi repræsentant. Insignia hæc, sed vanitati superstitionis accommodata sunt, longè ditior mihi thesaurus est, ex quo ornamenta, nullo vnquam pretio æstimanda colligi, & ad Coronam immortalis memoriæ contexendam, transferri debent. Ficti ibi, simulati, ementiti splendores; non tam à Cælo; quàm ab ostentatrice adulatione mutuati: Serenissimæ Reginæ, fulgores, veri, integerrimi, candidissimi, intaminati; quia à virtute delumpti. quæ (vt lucidissima eloquij Pharos testatur

Tullius,) lucet in tenebris, splendetq; per se semper, neq; alienis vnquam sordibus obsolescit.

Vnde verò potiùs; quàm ab illa virtute, quæ de propinquo numen spectat; & quasi stellæ iuxta solem; sic voluitur circa primam & purissimam mentem, scilicet Pietate, primum laudationis iubar accendemus? Est ea grandis Regnorum felicitas, cùm tales ijs, supremi munere Numinis, Principes eueniunt, qui digna cælo pectora, eximiæ submittunt pietati: & ardenti Religionis studio, quantum humana imbecillitas præstare potest; animum cum Deo coniunctum habent, eiusq; cupiditate Diuinitatis inflammatum. Nam cum tria sint, quibus fundamenta Rerumplicarum salutis continentur, honestas imperantium, auctoritas, felicitas, horum certè trium, admirabilis venustas, species, elegantia; incredibile robur, firmitas, potentia, non in alijs Principibus cerni potest; quàm qui in sempiterno Numine, illius incensi studio, mentem defixerunt suam; ab illoq; tanquam totius boni Principe, hæc tria præsidia, fidenter efflagitant & reposcunt. Spectauit hoc Orbis in Constantinis, Theodosijs, Heraclijs, Gratianis, Martianis, Rudolphis, Carolis, Ferdinandis: spectauit Polonia Nostra, in Boleslais, Casimiris, Vladislais: spectauerunt aliæ Nationes, Hispania in suis Alfonso & Philippis; Anglia in Eduardis; Hungaria Stephanis; Bohemia Venceslais; Gallia Ludouicis: spectauerunt omnes Regiones, in Principibus integerrimæ pietatis, & simplicissimæ integritatis, qui cum continuis deuotionis actionibus, in Deum sese; debitâ semper cum submissione transfunderent: non modò honestatis mirabili decore, magnificè placidèq; fulgebant; sed eminentiâ quoq; quadam auctoritatis, omnes in sui venerationem conuertebant, omnibus ferocissimis Gentibus, timorem sui incutiebant: & cælitùs sibi adiunctæ prærogatiuæ felicitatis, duras atque asperas rerum vices, beatissimâ rerum omnium affluentiam, compensabant. Commodissimè itaq; Coronam Radiatam texens, à Pietate primos radios accendo; tum quod eius Principes circumfuso iubare illustrati, non aliter in publico conspiciantur; quàm illi, quos meliori pollice, in ipso Matris utero, Fortunæ fors finxit, quibus Gratiæ nascentibus arrisere; tum quod ea horrorem, & caliginem temporum, à Rebuspublicis procul pellens, omnia ad cunctorum lætitiâ, faustissimis auspicijs moderetur. Age ergò, videamus iam, an Serenissima Defuncta, hoc probatissimo auro Coronam suam exornauit, hæc rutilanti gemmâ, vitæ suæ circuitus illustrauit, hoc cælesti splendore, sublimem suum animum decorauit: facillè deinceps iudicaturi, quæ sibi hoc immortale ornamentum adsciuerit, elegerit, assumpserit, ad immortalitatem esse perennibus elogijs transferendam. Hic ego iam me fortunatum puto, cui inter opulentam rerum omnium vbertatem, singularia tantùm delibare cogitan-

gitanti: tam multa selectissima pietatis occurrunt documenta, ut non tam paupertas mihi sit materia inculcanda; quam potius verendum, ne me ipsa copia inopem; ipsa rerum Maiestas, elinguem faciat Oratorem. Principio, cum Serenissima Regina, ex inclytissimo, Ducum, Heroumque Montis ferrati, Ferrariensium, Bauariæ, Mediolanensium, Barensum, Hetruriæ, Guastallæ, Retelli, Cliuiæ, genere prodijisset: quod non tantum antiquitate nominis, splendore, pacis ac belli studiis; affinitatum cum Orientis, Occidentisq; Imperatoribus, Galliæ, Germaniæq; Regibus, amplitudine; virtutis commendatione, semper fuit illustrissimum: sed etiam intaminatæ Religionis Catholicæ, non interruptâ serie, acerrimos semper propugnatores & defensores; Cælo sanctitate, atque innocentia, spectatissimos Indigetes, procreare non desistit: videbatur inflammata in Deum pietatis, spectata in Religionem Orthodoxam inclinationis, igniculos, ex clarissimo, nobilissimi Generis splendore, cum ipso adhuc ortus sui initio traxisse. Loquuntur hoc, & denuntiant manifestè, omnes eius ordinatissimæ actiones: in quibus ad absolutissima ideam, amussim, & exemplar pietatis, ita sese concinnabat, ut si indubitatum est, quod Sacræ nobis literæ prodiderunt: pietatem & timorem Diuini Numinis, aut animam hominis esse, aut eius vitam: crediderim ego, non aliâ eam animâ vixisse; quam pietatis. In Persiæ Regum tabernaculis, imaginem solis, crystallo inclusam fulsisse; ignem exeuntibus, argenteis altaribus prælatum, antiqua nobis testantur monumenta. Fortè ideò, ut aspectu illo ignis, & solis, quibus illi Diuinos honores deferebant, supremi Numinis sibi recordationem instaurarent. Ignem multò melius, Serenissima Regina pietatis, in imo pectore accensum, perpetuò fouebat; ut non aliter, nisi ut imago solis in crystallo; cunctis suis in actionibus reluceret. Appello omnes eius progressus vitæ, in quibus hoc nitidum lumen, eximie semper emicabat. Quò enim aliò Serenissima Regina direxit gressum, nisi eò, quò ducebat Pietas? quid aliud prompsit lingua? nisi id, quod præcipiebat Pietas? quid in conuersatione expressit? nisi id, quod regulabat Pietas? quam in omni actione tenuit normam, & exemplar spectabat? nisi id, quod Pietas imperabat. ita ut nihil in omnibus eius negotijs fractum, in sedulitate profanum, in sermone neglectum, in conuersatione remissum, in omni vitâ indecorum, lyncea cuiusvis malignitas subnotaret. Appello rursus, castissimas, delicatissimas, piæ mentis eius solitudines, in quibus illa, multò tenerius; quam olim opibus, ac luxu dissoluti, Persarum Reges, hyemem Babylonie vel susis; in Mediâ æstatem agentes, respirabat. Quoties enim, quoties videre erat, Serenissimam Reginam, secessu à turbâ influentium negotiorum quæsito, inclusam Virginalibus puellarum Deo dicatarum Asceterijs: velut in placidâ Halcyonum serenitate,

& deterſi cæli riſu, contemplationibus Diuinis, animum ſuum, ſeriò occupantem. Quoties videre erat, alijs euolutam curis, in eo in-tenſo defixam ſtudio, vt breuiſſimæ meditationis compendio, in ipſum Diuinæ gratiæ centrum, in ipſum cæleſtis ſapientiæ meditul-ium penetraret. Quoties intueri erat, inter puriſſimas illas men-tes, cæteris neglectis & contemptis, hoc vnum agitantem, vt Deo ſuo, probitate, & conſcientiâ liberrimâ nixâ, ſeſe præſentaret. Ibi Sereniſſima Noſtra Princeps, altera planè Orientis Pulcheria, altera Eudocia, aurâ prorsùs aliâ hauriebat; & longè aliter de humanis, quàm in Regalib⁹ palatijs ſentiebat. Ibi corporis cōmoditatib⁹ intermiſſis, loquente pupillâ oculorū ſuorū, in ſuam redibat originē. Ibi caſtiſſi-mas verborū operumq; victimas, non in arâ hoſtijs præparatâ; qualē falſis Dijs, ſuperſtitionis cæno maculata, erigebat Gentilitas: ſed in profundâ cordis ſui baſi, Conditori ſuo dedicabat. A tanto pieta-tis æſtu, vehementiores proſiliebant ſtriſturæ, quæ aciem hæreticæ prauitatis hebetabant; quæ improbitatem, temeritatem, contuma-ciam, velut ſylueſcentes, ſine fructu agros, amburebant; quæ corro-borata diuturnis ſceleribus audaciam, ab imis vſque fibris, & radi-cibus extirpabant. Declarauit illud, cū in permultis alijs occaſio-nibus; tum præcipuè in Arriana Hæreſi, ſuis efficaciſſimis perſuaſio-nibus eiſcienda, exterminanda. Ferox & immane iſtud virus, ſubti-liſſimâ vi, permeans animos, & confundens vniuerſa, mirum, quàm potenter in Regno Noſtro inualuerat. A nouis Gigantibus Chriſti Diuinitas cæco impetu, & vaſtis viribus impugnabatur: & iam huc ventum, non vt in tenebris ſuis deliteſceret; ſed emergeret è priua-tis angulis, & ſe in luce Noſtræ Gentis collocaret. Moerebant bo-ni omnes, maximè cum viderent, hoſtium crudelitatem, talium fla-bris Æolorum concitari. ſed vt fit in libertate, cū ſinguli fre-merent; ſuſtinebant vniuerſi. Non ſuſtinuit tamen Sereniſſima No-ſtra Princeps. Illa cētiſceps hoc monſtrum, ſuâ auctoritate iugu-lauit: illa effecit in Republica, ne vltteriùs ſerperet in publicum exi-tium; ne domi, ne in Penatibus domeſticis contineretur; ſed vltrà limites Regni, vltrà Polonæ Gentis confinia ablegatum, iaceret tan-dem proſtratum; & ſe percuſum ſentiret; & retorqueret liuentes oculos ad hoc Regnum; ex quo ſe pulſum, cum ingenti dolore, me-miniſſet. Sed enim parū adhuc viſum Sereniſſimæ Reginæ, de-mergi in ipſo myſticæ voluptatis torrente; aut hunc torrentem tur-bantes abigere; niſi etiam ſocios habuiſſet: parū reperire pretioſam Margaritam; aut pretium huius Margaritæ ignorantes contemnere; niſi amicos ad congratulandum conuocaſſet: parū ſub tam felici tabernaculo requieſcere; & quieti huius tabernaculi obſtrepentes, relegare; niſi locum eiſ ad alios excipiendos dilataſſet. Otioſus ſcilicet Diuinus amor non eſt, & cū alicuius capaciſſimum pectus impleue-

impleuerit; quærit adhuc vicinā, in quæ redundet loca: neque contineri potest; quin minimas etiam occasionum rimulas inuestiget, & ambiat, per quas prodeat in apertum. Excitat igitur maius incendium amoris in Deum: parat Pietati stimulos, ardori duraturo flabella, atque vndiq; Viros pios & deuotos cōuocat, qui vnā cum ipsā, diuturno gelu constricta pectora, & frigentes sine cultu Diuino animos, sanctissimo amoris cælestis igne corripiant, & gratissimas victimas, suo offerant Creatori. Ad expurgandam impietatem, poliendam barbariem, profligandam imperitiam, extirpandam crassam Diuinorum arcanorum ignorationem; inducit in Suburbium Varſauiense, maximā in DEVM propensione, inclinatos Sacerdotes, eosq; ibidem collocat, munificentissimè ditat; eo fini; vt elegantiam, pietatem, morum optimorum perfectionem, propagent, improborum sceleribus cautissimis obſistant monitionibus, & cum vitiorum omnium efferatā immanitate, bellum gerant gloriosum. Vocat paulò post castissimi amoris vinculo, Christo conglutinas Sponsas, lectissimum Virginum germen, Sancti FRANCISCI Salesij, Seraphini Gallici, rigidum institutum tenentium: dilectas Agno illi cælesti, ob niueam vitæ puritatem animas: easdem in viciniā Palatij Varſauiensis collocat, optimā locupletat prouisione, vt à mundanis expeditæ curis, tantò facilius, ingenitam illam percipiant lucem; tantò promptius suauissimis contemplationis itineribus, in primam pulchritudinem tendant; quantò minorem sibi per Optimam Fundatricem, viderent superesse, de rebus, vitam concernentibus, necessitatem cogitandi. Quid hîc ego dicam de eius incredibili, in Candidissimum Carmelitarum Excalceatorum Ordinem beneuolentiā? quibus cū pridem suum amorem, patrociniumq; addixisset; grandem etiam summam, pro excitando Templo Leopoli, liberaliter erogauit. Quid de singulari, in alios Sacros Ordines affectu, quibus illa, cū in eorum necessitatibus, libenter lætissimum vultum, indicem animi pij demonstraret; cum quibus, cum promptissimè rerum Diuinarum colloquio se se oblectaret; quorum preces, cum clementissimā humanitate exaudiret; illisq; è præscripto addictissimi pectoris celeriter assentiretur: eosdem ad propagandum cultus Diuini zelum, mirificè semper animabat, largis subsidijs adiuuabat, ab improborum insultibus tuebatur, omnem securitatis fiduciam prouidebat. Et erit qui huic feruentissimæ Pietati, inuideat æternitatem? quid est, in quo magis eius se se deuotio, in DEVM exerere potuit? quæ non tantum in recessu & umbrā hoc agebat, vt præpetibus Pietatis alis, perpetuò sese ad DEVM attolleret: verum etiam omni labore contendebat; vt quàm latissimè hic Diuinæ Pietatis ignis, multorum veluti manu, atq; ore actus, extensusq; perueniret.

Hîc iam mihi, magna dicendi sylua subnascitur, ex qua nunquam

me satis expediam, nisi cogitatione legentium fuero subleuatus. Ut enim si de limpidissimo fonte aqua haurias; quanto plus inde prompseris; tanto plus gelidi humoris, benigna Mater terra, per occultas venas ministrabit tibi: ita pietatis dulcedinem, quanto magis tenerrimis sensibus imbiberis; tanto plures sese virtutes tibi arctissimo nexu applicabunt. Regina virtutum nempe, Pietas est, solitaria incedit, nunquam, trahit in societatem, quidquid magnificum est; & Dei vultibus cum se sistat; sine apparatu ceterarum laudabilium actionum non aduenit. Maxime vero illas suo lateri comites adiungit, quae velut sacra procella, & aureus imber, in munificentiae nubibus collectus, copiosis beneficijs, in amentes indigentium descendunt sinus. Sicut speculum, quod nulla turpitudinis insperit macula, cum directe soli opponitur, ita ut eius illum vultus nitorem excipiat, & dispersos radios colligat; statim deinde collectos in circumiacentia, spargit; eaque aliquando, si forte concipiendae flammae idonea sint, non illustrat tantum; sed inflammat: ita integerrimus animus, cum lumen in se Diuinum clarissimum recipit; non solum ipse mille venustis caelestis gratiae micabit facibus: sed etiam ad aliorum obscuram tenebricosamque sortem, charitatis & humanitatis lucentibus stricturis illuminandam, pia quadam necessitate, & dulcissimam violentiam celer fertur. Quod eximie in Serenissimam nostram Reginam, Sarmaticus vidit Orbis. Postquam enim in confinium aeternae lucis, Pietate suam peruenisset, mirum quantis prodigae Pietatis luminibus cepit, omnium mentes, omnium tenuitatem continue recreare. Videbatur profecto pia Serenissimae mens, non aliud quidpiam, nisi magnam quoddam fidus, quod totam spargit claritatem, citra ullam electionem eorum, quibus est profuturum. Videbatur vber & pingue solum, quod muneribus suis non homines tantum; sed etiam iumenta saginare, & satiare non recusat. Videbatur collecta ferotina nubes, quae in aestu calamitatis, opportunas sitientibus fundebat lymphas. Videbatur arbor procera, ditissimam fructum onerata ubertate, quae praetereuntium dextras, officiose sese flectens, inuitat ad carpendum. Videbatur portus communis, ad quem omnium miseriae appellebant, ut se felicitate transmutarent. Videbatur fons publicus, qui omnium siti inseruiebat, immo qui suo fluxu, quarebat sitientes, & se sponte non poscentibus offerebat. Demittebant sese, beneficae Serenissimae Reginae manus, in intimas sordes, facemque iacentium in plateis relictarum pupillarum, quas sollicitè obseruans eius amor, tanquam suauissimam Deo venationem, in Xenodochijs, Orphanotrophijsque; à se insignibus foundationibus erectis, & in singulos annos sufficienti proventu auctis, intimo inclinationis propensae sensu, reponebat. Versabantur in squalore carceris, & reorum, quos multoties soluta de suo pecunia, ex ijs paenarum ergastulis eximebat. Versabantur in
infimae

infimæ plebis vilitate, in quam sæpius incredibili beneuolentiæ significatione, grandem summæ portionem diuidebat. Versabantur in omnium hominum necessitate, quorum illa studebat commodis, ingemiscebat damnis; quasi omnes homines in suis visceribus genuisset; quasi ipsius cor, aliena mala potissimum cruentarent. Ad eam veniebat oppressio miserorum: illa lamenta Viduarum excipiebat: illa lugentium innocentes, sistebat lachrymas: illam Patronam infantes sibi deposcebant: eius latus, pro iustitiâ, contra improbitatis potentiam requirebant. Neq; quidquam sibi fuit iucundius, quàm paupertatem multorum, optatissimis benignitatis muneribus locupletare, dare salutem afflictis, distinguere singulos dies, non tam horis, quàm beneficijs, nouam pluribus felicitatem, nouam fortunam dispensare, esseq; commune quoddam pignus, factorum meliorum. Spectasti hoc incredibili tuâ voluptate, annis ab hinc quatuordecim, ne per multa minora exempla curiosè vager, totius Orbis Polonici, compendium Cracouia. Meministi inquam, neq; quæ tua est in Altricem gratitudo, è memoria tibi patieris effluere, quod tam palmario didicisti experimento. Tenes dulci recordatione Serenissimæ Reginæ animum, loco salutaris Helyces tibi affulxisse, quæ nubi-la & fulmina malignæ tuæ sortis, liberalitatis beatissimâ malaciâ confopiret. Nescio, quæ tum temporis factorum inclementia, vindicem extenderat dexteram in hanc Urbem. Crudelis Libitina, fortè an à Diuino furore, in communem perniciem laxata, multis millibus incolarum, breui tempore eam spoliauit. Rara in vasta Ciuitate, & pomerijs Domus, quæ compluribus non redundaret funeribus; alibi integræ Familiæ efferebantur. Languidæ Matres, hinc maritos efferebant; hinc filijs præparabant pollinctores. Robustiores, deficientem morientium spiritum, vtcunq; fulcire conati; expirantibus, ipsi deniq; incumbabant, & vno supremo officio, ad tumultum portabantur. Nullum pauperis, nullum diuitis discrimen, cum omnes humanitatis leges, suprema necessitas confudisset. Ad extremum vi mali inualecente, consumptis pestilentia contagionis, qui vltimum morientibus, sepulturæ præstarent obsequium, occurrebant ubiq; in sepulta cadauera, & solitudo plateas, triste iustitium tabernas, ferale silentium totam Ciuitatem occuparat. Nondum tamen hîc sæuitia stetit fati. Deficientibus enim in dies hominibus, nullo ex remotioribus locis, ob metum, ad Urbem accedere præsumente; cum artes quoq; operæq; artificum, aliorumq; qui sibi quotidianis laboribus victum quærunt, studia quieuisser; rarus cum com meatu, nec nisi eadem infectus contagione, non exiguo pretij impendio, eum distrahendo, in Urbem penetrabat. Ita fames breui, & omnium rerum indigentia, in eandem Urbem immigrauit. Fæda res! morbus inuadit, mors imminet, ubiq; grassatur Nemesis: orbitates suæ à filijs;

lijs; amicorum iacturæ, ab amantibus deplorantur; gemitus, eiulatus, querulæ dolentium voces, aures pulsant: est tamen aliud, quod sæuius furit in afflicto. Nam quid miserius est, quam in summo rerum omnium defectu, ægrè fugientem spiritum, vtcunq; continendo, non posse tamen occurrere indigentia: & quamuis, ex vnius pertinacis monstri rapacibus vnguibus, mirâ te explicueris felicitate, adhuc tamen alteri non minus sauo obijci exponiq; quod te consummat per momenta. Sic adfectos, afflictoq; humanâ maior, atq; incomparabilis Serenissimæ Regina respexit benignitas, & tempestiuo effecit præsidio, ne quispiam se non vno modo miserum quereretur. Strinxit omnes benignissima Princeps, mitissimo humanitatis complexu, multisq; florenorum millibus, in singulas Hebdomades, erogatis, hoc demum peregit, vt se miseri homines ex illo squalore, tantò facilius liberarent, & enatarent è diuturnis malis, & tandem in statione melioris fortis quiescentes, de pristinis malis, queri desinerent. O fanè longissimas Serenissimæ Regina manus, non ad puniendum; quod ille de Regibus aiebat: sed ad remedia, liberalitatemq; præstandam: non ad pænam reorum, sed ad omnium felicitatem. O exemplum cunctis Heröicis mentibus imitandum, in quo regnatoris Supremi DEI imaginem, euidentissimè licet intueri. Quamuis enim ille mirabilia sine numero operetur, eiusq; immensa vis atq; potentia, nullis sit limitibus coërcita, amat tamen diues esse in misericordia. Nemo eo benignior, nemo tam Pater, extra se (vt ait Sanctus Dionysius) egreditur, omnia peramanter complectendo, omnibus prouidendo, omnes ab imminentium terrore periculorum eximendo: nisi qui obstinatâ malitiâ, suæ bonitati oblucentes, vltro ipsi malunt interire; quam seruari. Erat olim in consuetudine stultissimis Gentilium Principibus, cum grandi Diuorum contumeliâ, Diuinos honores appetere; & non aliter in publico, nisi modo non humano comparere. Sic insolens ille, & arrogans, Dionysius Poliorcetes, cum aliquot fortè Vrbes, in Græcia vi cepisset, & funditus diruisset; non est veritus procedere in publicum, capite duabus tænijs cincto, calceis auro tinctis, chlamyde acu pictâ, in qua cælum, & sidera, & mundus, artificii depictus manu, per vestis fimbrias, & cadentes limbos operosè discurrebat. Sic ferocissimus Alexandri Satrapa Clytus, cum apud Amorgum, tres aut quatuor triremes subuertisset, suâq; fortunæ exiguitatem, altè nimis expenderet; neuiquam sibi pudori duxit, Neptuni cognomine vocari, & tridentem gestare. Sic Dionysius Iunior, cum paulò prosperius, in Tyrannidis inuisæ possessionem deuenisset, Apollinis se filium, turpi mendacio iactitauit. Sic Magnus Macedo, cum feliciter Darium, cruentis aliquot prælijs superasset, Iouis se filium non dici tantum, sed etiam credi ab inuitis extorquebat; tanquam perinde animis, ac linguis impera-

imperaret. Ne multos memorem, laudatissimus alioqui Princeps Augustus, ne ipse quidem huic vanitati, non succubuit, cum se templis, & effigie Numinum, per flamines & Sacerdotes coli voluit. Qualis, quæso, ista Diuinitas, per scriptas humano cruore leges, per exilia, & proscriptiones, per madentes alieno sanguine terras, lassatam tot innocentum excidio crudelitatem, innumerabiles oppressorum gemitus, & florentissimorum Regnorum vastitates, cultum ab infensissimis populis exigere, & suæ memoriam exuere conditionis. Commodius fortè, & modestius immanes regnassent Vrsi, & feri imperassent leones, quàm tot mortales, quibus etsi leonum rictus defuit, non defuit tamen sæuitia, in lacerandis hominibus, opprimendis, trucidandis. Si DEI inuisibiles lineamenta, in hoc mortalitatis suæ luto conspici appetebant, Diuinorum illis imitatio morum, præcipuâ curâ fuit attentanda. Si illecebris cælestium honorum capiebantur, rapi debebant in similitudinem illius Naturæ, quæ in mortalium vsus, & delicias tota sudat, & cuius è sinu & gremio, habent rorem suum Cicadæ, & sua horrea auiculæ. DEVS est (omniscius Naturalis Historiæ scriptor loquitur,) mortali iuuare immortalem, & hæc est ad æternam gloriam via. Proximum Dijs tenet locum, (clamat è suâ porticu Romanus Zeno) qui se ex Deorum natura gerit, beneficus, ac largus, & in melius potens. Benè alijs facere (affirmat Synesius) hoc solum habent homines, cum DEO commune. Reuera (doctissimus è veteribus scriptoribus Ecclesiæ, Clemens profitetur Alexandrinus) DEI est imago, homo benefaciens, quâ in re ipse etiam beneficio afficitur; sicut Gubernator simul seruat, & seruatur. Hanc DEI similitudinem adumbratam, & viuus figurarum formis animatam, in Serenissimâ nostrâ Reginâ, palàm erat intueri. Non illa in supremo fastigio, humanæ imbecillitatis exuit recordationem; neq; cælum in veste, vt superbus Demetrius: sed cælestis munificentia colores, in expanso pauperum afflictorum sinu duxit; sed supparem stellis animum, in promptè alacriterq; præstandis beneficijs declarauit. Non cum arroganti Clyto, tridentem gestauit, quo pacati orbis tranquillitatem, nouis fluctibus agitauit: sed cum Pallade ramum oliuæ protulit, quo cunctorum animos, amabili bonitate recreauit. Non cum Macedone Alexandro, non humanum sibi quidpiam arrogauit; sed DEI celeritatem in benefaciendo, exprimendam sibi censuit. Non deniq; cum Augusto, templa sibi insigni magnificentiâ attolli vidit: sed viuâ hæc templa DEI, in quibus supremum Numen colitur; animalia DEO proxima, in contemplationem omnium, quæcunq; mundo contigerunt constituta, omnibus sibi ornamentis cumulanda iudicauit. Sic cum Diuinum sit, benefacere omnibus indigentibus: diuinum aliquid, in serenissimæ Reginæ pectus descendisse, æquum est credere: cuius feminibus sæcundata anima illa, excellens, illibata,

tam prolixè ad humanitatis & bonitatis officia succrescebat, & tam maturos fructus producebat charitatis.

Quis verò dicendo consequi, & celebrando exornare poterit, quæ eius in Sanctissimam DEI Genitricem, fuerit affectionum inclinatio? qui cultus? quæ Religio? Hanc illa Regnorum suorum firmissimam columnam dicebat; hâc auspice omnia aggrediebatur: hâc præside gubernabat imperium; hâc belli, pacisq; moderatrice nitebatur; huic se, huic subditorum suorum incolumitatem, victorias, triumphos, huic sua omnia prospera aduersaq; commendabat. Recordari libet temporis illius, quo Vandalicus turbo, deuoratis Poloniæ spolijs, arroganter tumidus, victoriarum non tam obtentu, quàm spontaneo affluxu, superbè nimis elatus, longo virium suarum vsu, & experimentis ferociens, post fatigatas diuturnis malis, integras nostras Prouincias, Ciuitates, Oppida; Clari montis Czestochouiensis mænibus incumbibat; vt secundo Marte, Regnum nostrum, peruagatus, etiam confinia nostra, propter imponendum liberis ceruicibus iugum, præsidij firmissimis contineret. Ferebamus hoc onus Poloni, quiq; præ cæteris Nationibus, aureâ libertate gloriamur, nunquam magis duram seruitutem exhorruimus; quàm dum fæda Iconoclastarum rabies, in locum illum, quem sibi elegerat Supremum Numen, eiq; proxima Augustissimæ Virginis benignitas, confurrexit. Infundebatur vicinis Regionibus metus, iamq; cum Fortunâ Poloniæ actum putabamus, quia cælitus nobis hoc delapsum ancylum, hoc scutum firmissimum, hic murus Poloniæ, non tam ex Parijs, aut Carystijs marmoribus, stupendo opere ad diuturnitatem excitatus; quàm sacrâ Religione hucusq; inuictus, & inaccessus caput oppugnari. Sed nemo tamen, aut teneriùs sensit, loci sacri iniuriam, aut feruentiùs ad eum quantocyus, tristi obsidionis diuturnæ necessitate exoluendum, semet applicuit, quàm Serenissima defuncta. Illa cum Serenissimo Nostro REGE, cui de nostris annis, vtinam. DEVS adijciat annos immortalis, vt diutissimè bono publico, vitâ mortali perfruatur; illa obseffos per submissas clam literas animauit: illa deinceps cum Serenissimo REGE, alijsq; Proceribus Regni nostri congregatis, aliquâ parte copiarum, vt fieri potuit, in tantâ trepidatione collectâ, in Poloniam è Silesia demigrauit: illa Exercitus Regni promissis, pollicitationibus, lenitate, liberalitate, iniuriarum obliuione, à Sueco abduxit; & ibi rursus iecit fundamenta redeunti fortunæ, quàm, si concordēs erimus, non faciliè posthac iniquitas vlla casuum est subuersura. Et quoniam in hunc montem, in quo beneplacitum est Domino, bona quædam fortuna me deduxit, non possum tam citò de illo descendere; nisi illud plenum demissionis, plenum pietatis, plenum amoris cuiusdam immensi, incredibilis, in sanctissimam Virginem opus, vtcunq; indiseratâ licet oris mei facundiâ prædi-

prædicâro. Audite pietatis prodigium euoluta sæcula, & si placet exemplum, proferte ætati consequenti ad omnem perennitatem, ne æuum nostrum, in tantâ licet senescentis mundi malignitate, maximarum virtutum infæcundum videatur. Serenissimi Principes nostri, locum illum, tam Deo gratum, tam Diuinæ Matri tenerrimo affectu probatum, ne quando similibus hostium premeretur insultibus, nouo submisso præsidio munierunt. Satis ne istud? Satis fortassis loci securitati; sed non pro eorum voto. Quod enim sufficeret minoribus mentibus; heroicis exiguum est: quæ vt pelagus aliquod, viuo beneficentiæ diluuiio exundare volunt. Itaq; instant Serenissimæ Maiestates, vt munitio in meliorem formam reducatur, integris Præfecturæ Crepicensis redivisibus, non interruptâ succedentium annorû serie, eam in rem attributis. Satis ne iam? Nostræ fortassis pietati, non eorum affectui & propensione. Est aliquid in Serenissimis Maiestatibus, quod velut ignis, ardentissimis suauissimi amoris scintillis, eorum mentes vrit; quod eas ad rarissimam Virginis obseruationem, potentissimè stimulat; quod eas à seipsis peregrinari, & tota calentis inclinationis vehementiâ, in suam seruatricem ferri cogit. Est aliquid in intimis earum fibris, quod generosæ virtutis fomites, in gloriosa suscitât incendia. Erant tunc propugnacula Monasterij, à recenti Obsidione, ruderibus plena & ruinis; Serenissimæ Maiestates non expectatâ meliorum temporum occasione, in illâ negotiorum mole, præsentibus periculis, futurorum sollicitudine, importunitate hostium, cum adhuc Polonia tumeret, tantisq; calamitatibus sæuientis belli necessitas incumberet, quantum angustia rerum, & temporum permisit, vallo & fossâ cingi, Monasterium curauerunt: ipsæ regales sarculis admouerunt manus: ipsæ hoc pio labore fatigari voluerunt: ipsæ non voce tantum, cohortatione, imperio; sed manu, operâ, exemplo, quid animi cunctis esse deberet, in auitâ Religione propugnandâ, in Beatissimæ Virginis, verissimæ Matris & Reginæ asserendo cultu declarârunt. Satisne tandem istud? Satis omnino, vbi ita viuit, in saxis, in parietibus, fundata recordatio Serenissimarum Maiestatum, vt non possit ex secutororum post futura sæcula nepotum, animis interire. Satis vbi ita pietatis suæ erexerunt trophæum, vt idem esset felicitatis monumentum. Stat adhuc Regium vel ideò dictû propugnaculum, properato opere, ac velut suâ sponte surgens, promptius tanto exemplo, quàm Orphei vel Amphionis cantibus excitatum, quod perenne futurum est testimonium, quàm profundè pietas, in Serenissimarû Maiestatum pectora descendisset, quarum curis & quasi manibus, tanta moles assurrexit. Narrent ergò Romanorum posterî, & vanissimæ laudationis augeant pompâ, sedulam suorum Maiorum diligentiam, qui nescio quâ oraculorum mendacium prædictione commoniti, Ficum Ruminalem, sub cuius olim umbrâ

Romulus & Remus, ab Amulio Patruo, proiecti volucribus, & feris, lupæ vberibus sunt pasti, perennitatem imperij, & felicitatem Urbis secum ferre, quàm diu virens, & suo relicta vigori seruaretur; tam sanctè, tantoq; eam studio intactam esse voluerunt, vt ea vltra octingentos & quadraginta annos, integris ramalibus, & recenti trunco, in nouos semper fatus reuirescere visa esset. Narrabimus nos multò iustius, omnibus literis, linguis, sermonibus diuulgandam, serenissimarum Maiestatum Pietatem, quæ non aliquam arborem, cæcâ persuasionem, fata secum Poloniæ trahentem; sed illam arborem, quæ meritum suorum Verticem, vsque ad sidera extendit; plantatam manu Dei, super montem excelsum, & eminentem, vt esset in cedrum magnam, & habitarent sub ea omnes volucres, & vniuersum volatile, sub vmbra frondium eius nidificaret: illam arborem, cuius proceritas contingit cælum; cuius aspectus vsq; ad terminos vniuersæ terræ; illam arborem, cuius folia pulcherrima, & fructus nimius, & esca vniuersorum in ea; arborem vitæ, arborem omnium gratiarum medullam, arborem quietis, sub cuius vmbra fulmina innoxia cadunt, tumultus lenissimâ pace demulcentur, tempestates gratissimo ridentis auræ tepore molliuntur; arborem deniq; sub cuius expansis ramis, ipse Deus commoratur dulciter, omni sibi ratione colendam, conseruandam, ornandam, iudicârunt. Quæ exinde verò vel prodigia, vel signa exorati Numinis, ac penitus iam nostri, pietatem istam exceperunt! Ferunt cum Augustus, implacabilibus ciuilibus odijs consopitis, quæ vniuersum orbem, & maria tristissimo humani generis sanguine infecerant: Romam, inter triumphales suorum plausus, reuerteretur; eo ipso tempore Coronam, Iridis specie circa solem apparuisse, quasi prænuntia esset, detergenda omnium bellorum fuligine, otij simplicem candorem, inter tartaræ tempestatis nimbos oriturum: & Augusti imperium, magis quàm solis matutinum iubar, lucem caliganti mundo redditurum, cum sine suo capite, discordia membra trepidarent. Hoc idem, in auspiciatissimo ex Silesia reditu, Serenissimarum Maiestatum, nostra conspexit ætas. Nobilissimus hic index, & auspex rerum, non ad discernenda tantum, & definienda tempora, diuinitus constitutus; verum ad significationem aliquam, & præfagia meliorum successuum facienda, cælo affixus, trinus cum duplici solari Coronâ, visus est supra verticem Montis diluxisse; quarum altera versus Meridiem, porrecta ad orbem vsq; solis, fastigio pertingebat; altera latius per aërem extensa, Monasterium, cum toto Monte ambiebat. Exultare ergò omnes, & lætitijs omnibus incedere, & Serenissimos Principes, faustissimis ominibus prosequi, & deposito mærore, exhaustisq; lachrymis, hilariter tandem reuidere, & nouam sibi conuersionem rerum, optabili festiuitate, cunctorum mentes perfusuram polliceri. Alij hoc pulcherrimo spectaculo

culo, inclinatifsimam Diuini in nos Numinis benignitatem, dicebant demonstrari: quòd vt sol dissipatis, quæ obsistebant lumini suo inuolucris, pulcherrimè ad speciem illuxisset coronatus: sic Serenissimis Principibus, in Hemisphærio Polono exorientibus, fortunam hucusq; obnitentem, nulla esse impedimenta vincendi hostis obiecturam. Alij hanc duplici Coronâ, coronari à summo Præsidente, pietatem eorum in Ecclesiam, & Patriam interpretabantur: quòd illi, cum ad tempus coactis atris malorum nubibus, sese subduxissent, rursus se nouis pro vtrâq; periculorum fluctibus, Herculeis animis obiecerunt. Alij cælum ipsum, plures sibi oculos mutuasse affirmabant: quòd quemadmodum execratum olim fædam Sueticæ crudelitatis, & impietatis vefaniam, cæcâ & densissimâ caligine sese inumbrauerat; sic ab illo tempore, mirificè exhilaratum pietate eorum, nullum sibi gratius euenire posse, spectaculum iudicabat; quàm nitorem magnificæ eorum virtutis, nigram tetramq; fatorum noctem, in auras & leues umbras dispellentis. Alij deniq; tranquillitatem temporum, iam certâ prælibabant exspectatione: quòd vt promus ille lucis fecundissimus, tamen in aduentu eorum, suam multiplicauit claritatem; sic turbulentissima illa tempora, quæ nonnihil residere incipiebant; in duraturam omninò pacem esse desitura; & datâ tranquillitate Poloniæ, in multis miseriarum incendijs suspiranti; faciem moderati imperij, haud aliter quàm sereni cæli, iucundè in oculis omnium splendentis, cunctis Regni nostri incolis, restitutum iri. Neq; irritam fuisse spem, vel vana prodigia, qui secuti sunt euentus, feliciter declararunt. In quo enim postea, Fortunam, sensimus nouercam? quæ nos hucusq; pertinaci odio fuit profecuta. In quo eam non experti sumus, potius mirificè nobis obsequentem? Quid fuit, in quo de eius malignitate, iuste quereremur. Nutabant hucusq; multi è militaribus legionibus, qui Sueco primùm adhæserant: concordēs postea animis, & moribus iunctis, in vnum corpus exercitus, cum ijs, qui ad Serenissimi Regis obsequium, sanctis contubernijs, & pari se integritate coniunxerunt, cõaluerunt. Destituebamur auxilijs, quæ eo tempore, cum maximè flagitaremus, vicinæ nobis negabant gentes: Austria confestim, cum florentissimo exercitu, & Ducibus ad militiæ gloriam, ab ipsâ naturâ factis, in tempore nobis ea suppeditauit. Volitabat hostis impunè in nostris Regionibus, fædo vlcere, & vulnerum confluxu, scatentibus Reipublicæ nostræ membris, nos crudeles ictus incutiens: certatim deinde desertus à Fortuna, ludibrium, velut in caueâ exhibilatus, orbi dedit. Tenebantur firmissimis præsidijs, potiores in Polonia nostra Ciuitates: passim deinde fidei se, Serenissimorum Regum submiserunt. Erat fædere hostibus, irretitus Serenissimus Marchio Brandeburgicus, grande momentum, ad potentiam hostis fulciendam: paucis post diebus Serenissimi

Regis, reuertentem postliminio Fortunam, effusissimâ cum gratulatione adorauit. Ciuitates, Oppida, Villæ, Homines, animalia, pecudes, salus, securitas, quies, virtus, fortuna, industria, quæ hucusquæ; in mæstum squalorem, deiecta iacebant, in nouam sese visa, commutare venustatem, & latioribus auspicijs, recentium successuum oblectari, & nescio, quam sibi grandem felicitatem spondere, & incredibili amantitate serenari. Ab illo certè tempore, si quis nesciuit, discere potuisset, nunquam victam humanis viribus, retundi Pietatem, quæ consuevit cælos expugnare. Ab illo tempore, si quis ignorauit, in cognitionem deuenisset, præeunte pietate, vires in arma suppetere, & felicem belli aleam rotari, & furiosi Martis, igneos æstus temperari. Ab illo tempore, si quis nunquam conspexit, vidisset, ductrice pietate, facile motus opprimi, iura conseruari, hostilium armorum vires debilitari, dissidiorum Ciuium tumultus placari, incendiorum furores mitigari, Urbium ruinas felicius resurgere, minas factorum sauius non terrere, & omnes cum oppressione subditorum, ærumnas euanescere. Ab illo tempore, si quis non audiit, experientiâ certè hausisset, arripuisset, sub præsidio Pietatis, florescere delicias pacis, vigere Maiestatem Regiminis, Ciuium concordiam regredi, bellorum prosperitatem innouari, agrorum fertilitatem, morum candorem, æquitatis vigorem, omnis imperij felicitatem, spontè bonos Principes, & illis subditos populos comitari. Benè ergo tibi sit Potentissime & Serenissime REX IOANNES CASIMIRE, (patietur hîc tanta Maiestas, in transcurso Nomen inferi suum, in quâ optimi Principis ideam, non Protogenis cælo, vel Apellis penicillo, sed viuus adumbratam virtutum coloribus intuemur:) benè tibi sit, quod vestigijs antiquorû Camillorum, Fabriciorum, Deciorum, Flaminiorum insistent, alteram manum supplicem, tendens ad superos; alterâ militares in hostes ducens legiones, ad restitutionem nostræ securitatis, mirâ sedulitate inuigilabas. Hoc cælestis virtutis curriculum, cum gloriosissimi maiores tui, ex linea Maternâ, illi Austriaci, ad publicam Orbis Christiani salutem nati, Rudolphi, Maximiliani, Caroli, Ferdinandi, Philippi, ex lineâ Paternâ, Iagellones, Casimiri, Alberti, Alexandri, Sigismundi, inoffenso gressu promouissent; tot victorijs de fuis hostibus reportatis, tot trophæis de subactis nationibus erectis, cum insigni nominis prædicatione, in luce totius Orbis, in spectatissimo Theatro cunctarum Gentium, duraturum vltra terminos mortalitatis, plausum meruerunt. Hâc tu nunc ratione ruinas labentis Patriæ, nouus Atlas humeris tuis, ex ipsâ miseriarum, abyssu extulisti; dignissimus, quem statorem calamitatum nostrarum appellemus, nisi tu, quæ tua pietas est, hanc totam laudem, DEO tuo integram transcribendo resignares. Benè sit & vobis gloriosi, extinctæ Ludouicæ manes. Fruimini quiete, quam tantâ nobis curâ

curâ quæsiſtis. Circumfluatis beatiffimâ luce, qui nobis tot crassas, & diu terris incubantes nostris tenebras, placido temporum sudo permutaſtis. Precamur viſionem illam felicem, viſionem beatam, viſionem placidam, vltrâ quam nihil eſt, quod ſibi mortalitas noſtra, poſſit maius exoptare. Precamur felix, in ſupernis Regionibus domicilium, qui pro nobis, in hoc Orbe Reipublicæ, motu voluiſtis moueri indefeſſo. Precamur, vt ſicut olim Herculem, corpore ambuſto immortalitas excepit, & duodecim radij, pro duodecim laboribus exantlatis: ſic Pietas veſtra, & eius pediſſequæ virtutes, æternûm præfulgentibus luminibus, in illâ lucidiſſimâ Patriâ ambientur.

Sed me repentè, de Sereniſſimæ Reginæ Pietatis, aliarumq; virtutum, ab hoc maiori quaſi Sole, minoribus ſiderum fulgoribus prodeuntibus differentem, & plura etiam dicere meditantem, Prudentiæ alij radij, in ipſo curſu Orationis, inſperatâ circumdant luce, & ad ſe animum aduertere cogunt. Progredior ergò, quantûmuis lento & inualido paſſu, & ſequor lucem præeuntem. Quam Prudentiam ego, non illam hîc intelligi volo, quæ mille ſinonijs vel Vliffeis inſtructa dolis, à calliditate ſecerni nequit, verſipellis, latebroſa, honeſtatis impatiens, omnia in ſpeciem faciens, nihil ad veritatem loquens, diſtrahens amicitias, miſcens diſcordias, promittens non facienda, faciens non toleranda, per ſpeciem officiij ſeſe rebus ingerens, & per inſidiosas illecebras, fascinans mentes, diuertens ſocios, opes infirmans, cunctos fallens, cunctis inſidians, qualem putida Politicorum verſutia, ex Tiberianis, vel Herodianis deducit praxibus: ſed illam hîc Prudentiam intelligo, quæ è confinio æternæ lucis descendens, vt tela maximo niſu in ſublime excuſſa, iamq; redeuntia, intimiùs in res ipſas penetrat; & ſolertiùs à Diuinorum contemplatione descendens, in humana negotia introſpicit. Illam hîc Prudentiam laudo, quæ ea, quæ ſunt optimè cogitata, ad proſperos ducit exitus, quæ ordiendo à fine, in eum, tanquam ſcopum, cunctis ſuis collineat actionibus: & quæ maturè ſunt deſtinata, non ſolùm diligenter; ſed etiam fortiter exequitur. Illam hic Prudentiam exiſtimari volo, quæ rerum momenta æquitate librat, difficultates dexteritate amolitur, hoſtium machinationes conſilio anteuertit, rationis imperia, non exiguâ cautione pertractat: quæ vt magna ſolent lumina, ad exiguæ molis opacum, tenues & in conum gracileſcentes vmbraſ ſpargere: ſic illa totam obiectarum difficultatum molem, velut exiguum arctati & conſtricti alicuius corpusculi globum, ſuo fulgore obruit. Illam hîc Prudentiam in præconia voco, quæ incontinentiam, ſi inualeſcat, facillimè proſtigat; improbitatem, ſi ſe exerat, efficaciffimè reprimat; malitiam ſi ſe diffundat, impigrè reſecat; vim, fraudem, dolum, temeritatem, ſi luxurientur, vtiliſſimo rigore radicatus exſcindit: ius porrò & fas, & pacem, & otium cum dignitate

in succedens etiam æuum promouet. Illam deniq; hîc Prudentiam commendo, quæ omnia bellorum tumultibus deplorata, indulgentiæ, clementiæ, tranquillitatis sacris fideribus adflat, & omnes beatæ vitæ communicatione, velut dulcissimo ambrosiæ pastu satiat, eosq; remouet, à tristi metu, infelicium sæculorum. Dicite amabo, nonne hæc talis fuit Prudentia Serenissimæ Nostræ Ludouicæ. Quis vnquâ Palinurus, quem Poëta Princeps, tanquam exemplar boni Naucieri describit, adeò sollicitè omnes ventos explorauit, omnes captauit, auras, omnia fidera labentia in illo latè patenti cæli ambitu notauit, vt felicissimè ad destinatum portum, velorum alas expanderet, nauemq; à præruptis scopulis, rapidisq; vorticibus expediret: vt Serenissima Nostra Regina, omnes benè consulendi Patriæ nouerat articulos, ne quando eam decumani fluctus, fluitantem in alto, tempestatibus seditionum, ac discordiarum, ereptis omnibus prorsus gubernaculis, absorberent: vt quod idem Poëta, de eodem testatur: cum perpetuò clauo affixum & hærentem, nunquam dulcedinem somni admittentem, oculos sub astra tenuisse, & ne in morte quidem gubernaculum proiecisse: sic ego meritò dicere possim, illam velut cygnum dulci modulationi, salubribus Patriæ consilijs suggerendis, supremum mortalis vitæ diem impendisse. Obsecro vos omnes animæ, apud quas tam insignis in Patriæ prouidendo Prudentia, tam sollicita circumspectio, amorem nondum perdidit: finite me tantisper, vt ad superiora tempora vestras remittam cogitationes, finite vt non nihil præteritorum annorum memoriam, in conspectu ponam. Quando vrgentibus in deterius res nostras fatis, aut iustius extimui-
mus, aut propiores fuimus discrimini, quàm cum ferocissimus ille multarum palmarum gladiator, totam secum barbariem trahens, velut commune quoddam incendium, vel publica pestis, ac lues, in nostram perniciem, præcipiti furore agebatur. Parùm est dicere, lectissimum Polonorum militum florem, sæpiùs hostium multitudine, licet non Virtute cæsum: integri exercitus sternebantur. Parùm est queri, ignobiliora Oppida suis incolis exhausta: florentissimæ Ciuitates, sæuiente in ætatem innocentem crudelitate, ad internecionem vsq;, sanguine, & cruore suorû Ciuium, implebantur. Parùm est ingemiscere, multa millia miserorum hominum, in Tauricam Cheronesum abducta: integrarum regionum cultores, post terga manibus reuinctis, frustrà domesticos lares respicientes, in hostiles terras, æternam ibi seruitutem seruituri, velut iumentorum, vel pecudum greges agebantur. Parùm est dolere, confusa humanitatis iura omnia: ne à Religionibus quidem sanctissimis, violentæ manus abstinebant. Parùm est lamentari, vastissimas Russiæ terras, latissimâ vbertate, supra omnium propè nationum genium exsudantes, & non tantùm in fruges, sed in voluptatum instrumenta luxuriantes, diuturnis popula-
tioni-

tionibus vexatas, crebris Scytharum percursionibus laceratas, ex-
stis populosis pagis deformatas, exterminatis è suis agris cultori-
bus exinanitas; ipsæ illæ opimæ Regionēs, & felices glebæ, solitudi-
nem deplorant suam; & quasi in vastis Arabiæ desertis, nullum ho-
minis occurrit vestigium: nauigantium modo sidera obseruantur, ad
quorum lucem, cursumq; , iter dirigant transeuntes. Non perfidus
Annibal, sexdecim continuos annos, amænissimos Italiæ vrens tra-
ctus, tantumq; ad Thrasimenum, Trebiam, Cannas, Romani sangui-
nis fundens, tot Vrbes, Oppida, Ciuitates, ab illius imperij corpore
auellens, miserabiliorem Regionibus illis intulit vastitatem; quantam
monstrum illud, quod ex ambitione, auaritiâ, perfidiâ, crudelitate,
tanquam suis elementis coaluerat, Russicis Regionibus, annis circi-
tèr quatuordecim, inuexit cladem. Non pertinax Samnium, integro
sæculo, indomitam Romanorum exercens virtutem, & viginti quatuor
triumphorum, præbens causam, pluribus stragibus domitum, ac sub-
actum, pristinam ferociam deposuit: quàm tunc beatissimæ illæ at-
tritæ sunt Prouinciæ, vt iam vix à cadaueribus cæsorū sepeliendis,
intacta tellus reperiri possit. Non ciuilia Romanorum bella, sæuius
occisionibus plurimorum capitum, totum imperium affligerunt; ;
quantis nostrorum occisionibus, illa Terra, exercituum licentiam,
tot atrocis belli furias, miserijs suis, & sanguine suo alere, atq; susti-
nere coacta, redundauit. Vt si fabulosum est, voluisse olim Simoenta
& Scamandrum, Græcorum præconijs notos amnes, decolores huma-
no sanguine lymphas, & armis corporibusq; , fortium Virorum tumi-
dos, nequaquam intra riparum suarum angustias substitisse; sed ple-
nissimis sese alueis in plana circumiacentia extulisse: veritatem iam
inuenerit in Russia nostra, non fluuios tantum, cæsorū sanguine de-
colores, vndas spumantes deuexisse, & cunctantes meatus vix elu-
ctatis cadaueribus, euoluisse: sed alibi ipsos sanguinis riuos, deletis
multis incolarum millibus, ipsa fluentia tristissimi cruoris, certatim
non ciuitates modò habitabiles; sed patentes campos permeasse. .
Dura erat profectò hæc fortuna Poloniæ, & crudelis, quæ tot annis
vnum nefarium Spartacum, vnum mancipium, in Rempublicam in-
sultare, debacchari pateretur. Cùm interea videre erat, Serenissi-
mam Reginam, in illa tempestate, ac nocte bonorum, in subitâ atq;
improuisâ formidine, in tantis tenebris, ac incendio Prouinciarum,
Diuinâ atq; eximiâ virtute, magnis nostris luctibus subuenire; & vi-
mentis herôicâ, ad sopiendas malorum causas properare. Vtinam
nobis singulos Prudentiæ eius actus, liceret intueri; Vtinam vim il-
lam animi indefessam, in bono publico promouendo possemus, ad
breuissimum tempus, oculis vsurpare. Cerneremus certè pulcher-
rimum exemplar velocissimæ mentis eius, in singula Reipublicæ cor-
pora diffusæ, quæ ingenia, egregiè ad salutem Reipublicæ procuran-
dam

dam animata; beneficiorum suorum dulcibus stimulis lacefferet; quæ ruentes aliquos in seditionem, blandis humanitatis vinclis, & compedibus constringeret; quæ robur fortibus, timidis audaciam, celeritatem tardis, omnibus fiduciam inspiraret; quæ velut classico omnes, sub signa euocaret, ad Patriæ calamitates depellendas. Cerneremus sublimem illam animam, velut ordinatissimum Horologium, quod interioribus rationum libramentis artificiosè impulsus, & præcedentium rerum, cum sequentibus connexionem, quasi quibusdam disparibus rotis mouens sese, gratissimam ederet harmoniam, ad omnia publica negotia, accurato ordine, & sine vllâ confusione transigenda. Cerneremus masculum illud pectus, in potestate moderatum, in moderatione prudens, in prudentia forte, suis propè manibus, hiantes imperij nostri rimas, in vnam compagem coagmentans, & totam fortunæ iram, efficaci dexteritate sistens. Cerneremus acre illud, & excitatum iudicium, occurrens vbiq; fortunæ casibus, in tempore medelam adhibens, imperitæ hominum temeritati, mala omnia in melius, facili flexu mutans, dura atq; aspera, leni correctione molliens, cautissimâ veritate fraudes arcens, circumspectâ fortitudine non abhorrens arma, constanti sagacitate non cedens aduersis, non temerario impetu, ipsis semet immergens actionibus, non præcipiti festinatione, improborum machinationibus metas ponens. Cerneremus deniq; heröicam illud pectus, alteram Phæarum, alteram nauigantium Arcton, ad cuius micantem lucem, Reipublicæ nostræ lacerata naus, cursum suum dirigeret, & post diuturnas iactationes, opportunam tandem defigeret stationem.

Gratulabatur sibi de tantâ Matre, in tristibus suis suorumq; ærumnis Polonia, & semimortuam ex imis visceribus depromens vocem, manantibus, inter stratos suorum Ciuium acervos, lachrymis, optimam Principem, tenui aspiratione geminabat: cùm interea læuiorem aliam procellam & tempestatem, ominosus Aquilo in nostras fudit Regiones. Heu tempora, sanguine potius, non sepiâ describenda, in quibus quæ memoriam præteriti temporis, bonâ fide conseruatam, liberali notitiâ dispensat Historia, non facillè est fidem inuentura; quia difficulter factum credent posterius, quod fieri non debuisset iudicabunt. Et quid enim tam Tragicum? tam crudele? tam atrox in Historijs visum, cuius non renouata in Regno Nostro, bello Suetico existent monumenta. Quos vnquam tam crudeles parturiit fortuna motus, quorum non luctuosas reuolutiones, hisce temporibus instaurarit. Antea quamuis sæpius à fortunâ pessimè tractati, quamuis infortunij, ceruicibus nostris incumbantibus, vndiq; pressi; tamen inter ipsa rudera afflictæ Patriæ, stabamus erecti, & meliorum spe, præsentium tolerantia, nos vtcunq; solabamur. Tum consumptis & exhaustis omnibus viribus, infixâ cordi Reipublicæ Nostre letali arundi-

arundine, iam mori, iam extinguere cuperamus; nec ullum spe, quæ extrema afflictos deserit, concipiebamus malorum finem, nisi quem victa, & satiata miserijs nostris fortuna, esset nobis concessura. Non enim vt prioribus bellis, extremas Regni Nostri Prouincias, truculentus Mars, infestis armis populabatur; sed ipsa interiora Poloniae, fædis hostium rapinis lacerabantur. Non vt cum spurcissimo illo Mirmillone, instructâ acie pugnabatur: sed mercatus liberorum capitum instituebantur, & subditorum in Dominos, mancipiorum in heros, cruenta violentia laxabatur. Non florentissima tantum Oppida, continuis deflagrabant incendijs, & in suis sepeliebantur cineribus: sed Sanctissimæ etiam polluebantur Religiones. Non apertam tantum vt olim vim metuebamus: sed fraudibus etiam, dolis, machinationibus, in corpora nostra, in animos piraticam exerceri videbamus. Non mutua vtrinque damna & incommoda inferebantur, & accipiebantur: vt saltem communis calamitas, ferream temporum conditionem emolliret: sed nostris hominibus, nostris opibus, nostris bonis oppugnabamur: nostræ nobis auxilia salutis, extremam formidinem intentabant. Si qui essent generosioris sanguinis, & qui supercilium arrogantis Domini sustinere non possent: hostili firmandæ potentiæ, miserrimè attriti & consumpti. Si qui simplices; ij ingentibus promissis onerati, & in partes adsciti. Cæteri vel duræ exactionis onere, vel excogitatis criminationibus capti, inuoluti, implicati. Plerique; partim metu impendentium malorum; partim tædio præsentium; blandâ specie imponentia ad præsens, sine labore; quam tuta in futurum malebant: & quasi iam de Polonia actum esset, quæcunque sibi viuendi præscriberetur conditio, sustinebant potius; quam vt inclementis inuasoris, timendas iras irritarent. Accedebat ad hæc mala, exercitus nostri, hinc vrgentibus ab Oriente Moschis & Cosacis; hinc à Septemtrione Suecis, primò insignis tumultus, trepidatio, & fuga: post aperta Sueco deditio. Accedebat Senatorij Fquestriisque Ordinis, in vicinas Regiones, desperatâ & comploratâ Patriæ incolumitate, fuga & discessio. Accedebat finitimorum Principum, qui in fide & clientelâ Serenissimorum Regum Poloniae viuunt, in partes Suecorum transitio, & cum iisdem fædus stabilitum. Accedebat munitiorum in Republica propugnaculorum, ab hoste partim machinis, partim machinationibus expugnatio. ex quibus illi velut speculis, vicina despectantes loca, acutissimè odorabantur, accuratissimè obseruabant, ne quæ fierent. occulta conuenticula, ad communem Patriam, è præsentibus malis liberandam. Quid memorem clam submissos coryceos, qui dubios cuiusque sensus explorarent; & si quid hostilibus conatibus aduersum fuissent suspicati, apertis prodicionibus deferrent hosti. Quid dicendo perstringam terribiles in dies exactiones, per quas, veluti suo

sanguine exinaniti populi, neruos & vigorem amitterent, ad pristinam recuperandam libertatem. Ac iam ne illas quidem implacabiles, exprimere conabor, si quis aliquid presentis statui contrarium molitus fuisset, penas: quæ irrogatæ, non vano terrore audentiores percellerent, & in officio repugnantes continerent. Relinquam etiam peragrarè dicendo, (ut tandem ad propiora veniam,) insignem Cleri contemptum, & crebra Sacerdotum exilia, & à templis extorta inaudita lytra, quibus ipsis animis, durissimæ seruitutis compedes iniiciebantur. Non ergo iam crebris singultibus, nec sæpius repetitis suspirijs; sed rorantibus lachrymarum guttis, & lugubri eiulatu, incolumitati florentissimi Regni, inferiæ parabantur. Non iam ab exteris anceps, & dubia nostra fortuna credebatur; sed velut in ultimo exitio, sepulchralia nobis Cenotaphia scribebantur; nec alius de nobis sermo, nisi calamitosus omnis erat. Non ulli Ciuium, vel tenuissima spes allucebat, tandem aliquando succisam istam arborem, in nouas stirpes pullulaturam; sed omnes ne fragminibus obruerentur procumbentis, tempestiuo sibi effugio succurrebant. Et profecto in tanto spectaculo occidentis Patriæ, cum ad extrema quoque fuisset ventum; cum nunquam à recentibus cladibus, vel leuissimam respirandi moram, fors benignior indulgeret; mirum fuisset, si tot iactati malis, abalienauissemus à presentium rerum sensu animos; & arma sola, ferrumque, prostrata spei nostræ reliquias, obstinati teneremus. Admirabiles erant, & ad stuporem usque, contra fortunam contumaces, Martiales illi Viri Romani; tamen auditofusum, fugatumque exercitum suum, ad Alliam flumen, sub Gallorum Duce Brenno; tantum conceperunt trepidationis, ut tota Ciuitas effusa portis, in vicinas diffugeret nationes. Adhuc tantum sibi post Cannensem cladem, videbant potentiæ circumdatum, ut integras in supplementa cæforum, emittere possent legiones, & tamen tam funestis perculsi casibus, cladibusque exhausti continuis, iam multi de deferenda Italiâ, consilia agitabant: nobilesque plurimi iuuenes, Duce Cæcilio Metello, ad Regem aliquem transfugere, turpi cum Patriâ diuortio facto moliebantur: nisi Scipionis fatalis Ducis ad oppugnandam Carthaginem, impigra virtus, desperatis consilijs obstitisset. Et miremur nostrorum pectoribus, excidisse spem, ad pristinum surgendi florem, cum hostes vndique insurgerent, amici ubique desererent, exercitus nostri cladibus exhaurirentur, nulla domi, nulla foris præsidia cernerentur, & tamen hæreret lateribus nostris pestilens sagitta, & gladius vaginâ vacuus, capitibus nostris immineret. Sed o miram Diuinæ in nos Prouidentię rationem! quæ cum intentat minas, iaculatur fulmina, minatur excidia, terret periculis, in perditis tamen rebus, Patriæ suæ reminiscitur lenitatis. Est cur o mea Polonia supremo Numini, pias exoluas preces; est cur fatearis in illâ tuâ tantâ imbecillitate,

litate, aliquam vim, aliquod è cælo patrociniū incredibilem propertione, remedij commodum tibi instruxisse. Ea vis igitur cælestis, quæ sæpè nobis incredibiles felicitates attulit, quæ tot perniciēs adulas profligauit, ac sustulit: quæ toties cruentos domesticos hostilesq; detersit enses: Serenissimis Principibus, eam iniecit mentem, vt in media illa pericula, in ipsam flammam, & incendium superbè successibus suis abutentis hostis, se inijcerent; torrenti ingruentium malorum, firmos aggeres struerent, opponerent sese fœdissimis, à quibus, si diutius Polonia possessa scelere inaudito fuisset, subiisset dedecus, ignominiam, seruitutem sempiternam. Difficile est, non modò verbis exequi, sed ipsâ mente & cogitatione consequi, ingentium in rempublicam beneficiorum magnitudinem, quibus illi, vt Reipublicæ moles, quasi implicatis adstricta nodis, nunquam dissiliret studuerunt; sed reliquis vmbra facere videntur, illa effusa in nos sub tempus latrocinij Suetici, beneficia exhibita. Proposuerunt tum Serenissimi Principes concursum Heröicarum virtutum, cùm tantis licet telis aduersitatum fauciati, properarunt tamen ad suorum vulnera obliganda, & se non nolle pro subditis in ærumnis viuere, pro subditis in ærumnis mori declararunt. Proposuerunt specimen prudentissimæ circumspeditionis, quâ in castris pro exercitu, in consilijs valuerunt pro Senatu: quâ languenti, deficienti, expiranti, Reipublicæ corpori succurrerunt; libertatem in tuto posuerunt; oppressam religionem, profanata templa, extinctas leges, sublata iudicia vindicarunt; quâ superba Dominum fastidia, æterna tributa sustulerunt: fœuendi in infantes licet iam, & barbaricam crudelitatem, ex oculis nostris, immò è memoria nostrâ eraserunt. Proposuit Serenissima nostra Regina, quam meritò cum ingenti tristitiâ, ereptam nobis lamentamur. Cui enim adscribendum est, quòd in illo decursu rerum, iacentia quorundam ingenia, & quodam torpore obstricta, ad verum decus iuuandæ Patriæ sunt experrecta? Adscribendum est Serenissimæ Reginæ: quæ molli quodam palpo tractare, & leni freno circumagere, nostrorum mentes docta, blandis vocibus mirificè eos est hortata, vt in imo positi, locum sibi resurgendi putarent datum: alternas enim rerum esse vices: & sicut in deterius optata; sic in melius aduersa flecti. Quis fuit, qui mirum cunctorum animis, desiderium libertatis inseruit, quod in tantis malis iam frigescebat, vt cum REGE optimo, in quæuis pericula sese ferre, & aduersis pectoribus vulnera excipere, & licet per apertam stragem, ad certissimam salutem iter sibi struere: quàm ad tempus simulatæ hostili clementiæ, confidere vellent? Hoc Serenissimæ Reginæ debemus beneficium, quæ in illâ supremâ necessitate, quos ad salutem Patriæ conseruandam, admirabili constantiâ animatos, præstantissimos videbat ciues, eosdem colligebat, & illâ suâ bonitate, auctoritate, beneuolentiâ permouebat, vt incensi tenderent ad

G

salu-

salutem Patriæ asserendam. Cuius consilij prudentissimis effectum est, quod Serenissimus Brandenburgicus, distractam hostilibus calliditatibus voluntatem, ad vnam communis salutis, curam reuocauit. Istud inter cætera est, quod Serenissimæ Reginæ Respublica nostra, fert acceptum emolumentum, quæ expeditâ cum Serenissimo REGE, legatione ad eum domesticâ, eum datæ Regno fidei admonuit, & ab improbâ Sueticorum armorum societate alienauit. Quis illum Rakocium de impotentis spei fastigio, turpiter deiecit; nec sensim sed subito fregit, vt vix cum paucis, fugæ comitibus, è media suorum internecione, & horribili captiuitate, semet trepidus expediret? Hoc eiusdem Serenissimæ est Reginæ, mansurum ad posteritatem nonumentum, quæ in Claro Monte conuocatis, qui præstò esse poterant Senatoribus, Ordinumq; militarium Ductoribus, inflammauit eosdem, vt maximis oloni populi luctibus, funeribusq; subuenirent, & Rakocij furorem, domesticis saltem Transiluanix populationib⁹ castigarent. Cuius dexteritati tribuendum est, quod nostris militum numero imparibus, apparatu inferioribus, laboribus exhaustis, cum tot difficultatibus conflctantibus, in propugnationis constantiam, externorum auxiliorum, accessit robur: quod Vrbes, quod Arces munitissimæ, sine sanguine Ciuium reuerata? His tam illustribus, & fructuosis operibus, efficacem manum Serenissima apposuit, quæ in eo bello tam difficili, nobiscum militare, nobiscum vincere, nobiscum prosperè pacisci, nobiscum vtramq; fortunam ferre, dulce sibi & decorum iudicauit: quæ (vt multa in compendium contraham) nullis parcebat sumptibus, nullis terrebatur molestijs, fatigabatur tædijs, quo minùs vndiq; certissimis auxilijs ad Patriam, ex præcipitio ærumnarum omnium eruendam comparatis, nos felicissimæ conditione pacis cumlaret. Tantorum in nos beneficiorum, sanctissima apud nos manebit in animis nostris, inscripta perpetim obligatio, communis illi cum Serenissimo REGE, cui manet, manebitq; semper apud nos, primus honor, & illibata gratia: communis etiam cum alijs præclarissimis Patriæ ciuib⁹, qui ad præclaram seruandæ Patriæ sollicitudinem, ductu, operâ, aut alio quocunq; insigni modo accesserunt. Illud verò iam Serenissimæ Reginæ, peculiari ac propriæ virtuti, adscribendum est: quod ad tantam prudentiam, munificentix etiam pulcherrimum adiunxit decus, & potiores suas in Republica partes, benè de ea merendo reddiderit. In conualecente, sed sine sanguine & neruis, Patriâ, grassabatur adhuc fæda tristisq; tabes, corruptura bona consilia, inopia scilicet rei pecuniariæ, quæ (vt æternum eloquij lumen testatur Tullius,) maximus in Republica nodus est. Tributa ne imperari quidem poterant, exhaustis, per immoderatas populationes subditorum peculijs. Militibus porro, nisi cos adsit aurea, hebescit acutus ensis, aut in viscera Patriæ vertitur, res fortunaq; miserorum Ciuium consumpturus. Didicimus

id sæ.

id sæpiùs tristibus experimentis, quibus exigua hæc scintilla, non in tempore redditæ, vel dilati stipendij, plura produxit incommoda, quàm formidata bellorum mala, & grassans hostilis sæuitiæ rabies, & professæ in nos odia populorum. Succurrit optima Regina: hunc prauum obicem, à conspectibus amouit nostris: depressis attulit iuamen rebus; iucundo sonitu adnumerati auri, in seditionem pronas militum mentes mitigauit; & non parcens etiam suppellectili Reginali, (quod olim tantopere in Antonino Pio, suspexit Roma) promptas eorum, ad recedendum à Patriæ obedientiâ voluntates, ipsa se pro Republica, opponens vadem, grandi pecuniæ erogatione repressit. Quid autem hîc rursus mirer? effusam benefaciendi celeritatem? an efficacitatem: beneuolentiæ in Ciues promptitudinem? an Ciuium pro Reipublicæ vindicandâ integritate fortitudinem? dominantium in subditos fauorem? an subditorum Principibus suis, studia obsecuta? Vnum illud in mutuâ beneficij vice, factum dicam, curatum seriò, ne quam in partem victoria inclinaret. Nam cum hucusq; vix hostili, ut cunq; potentiæ, ne inclementi sese proferret feritate, sufflaminandæ, exiguis viribus instructi fuisset: proposuimus abhinc Polonicorum armorum gloriam, apud hostes reuerentiam, finitimos auctoritatem, apud omnes immortalitatem parauimus; compensariq; labores nostros, beatissimâ laudum affluentia, lætati sumus: cum non modò veteranum hostem, qui nuper vniuersam Europam, in Germania, infinitâ malorum serie implicuerat, & ingentibus iacturis, cognatas inter se commiserat acies, longè trans sua maria propulimus; verùm etiam, iuimus inter sæua pericula, infra terram & maria, & pænè supra tonantem (vt ait Virgilius) cæli portam. Immò deficientibus prælio terris, immiti nos maris elemento, ingentes classes tantùm, & nauigia transuehere solito, campestres Poloni credidimus, & ultra littora Balthica, & Danicos sinus recedentem, nouis prælijs, primò exterruimus; mox etiam cruentis cædibus, vlti sumus. Excurrerem verò hîc vltèriùs in prædicationem togatæ, Serenissimæ Reginæ prudentiæ: numerarem gestarum rerum, inuitante sæcundâ materie longum ordinem. Celebrarem labores in æstibus publicis, quos illa obiectos aggressa feliciter sustinuit, & impedimenta, quæ illa obstantia dextrè auertit, pericula, quæ illa obtrusa facillè transcendit, salebras difficultatum, quas illa tumentes, nimis molliter complanauit. Ponerem in culmine summæ laudis, adiectas in omni negotio maiestati gratias, Gonzagano nomini omnium virtutum apparatus. Has aliasq; eius prudentiæ doctes, commendando percenterem; nisi iam viderem eas amorem publicum, in memoriæ suæ gazophilacio reposuisse, & ipse subuereri inciperem, ne me implexa, & verè lacinijs suis inuoluta toga, diutiùs in sermonis cursu moraretur. Veniat ergò & in huius ornamentum virtutis, coronatus radorum fulgor, vt quoniam Serenissima defuncta,

vnà cum Serenissimo nostro REGE, vt rutilum nauigantium sydus, in cæca caligine temporum, in nocte rerum, in tenebris ærumnarum, lucidissimam prætulit facem, ad Rempublicam diu cum fatis pugnantem suis, à supremi exitij discrimine liberandam; quoniam semper in prælijs magnanima, victorijs modesta, dubijs prouida, consilijs solers, executione eorum industriâ, in id vnum intento animo ferebatur, quomodo ciuium saluti mitibus subueniret aspectibus, verè Serenissima, verè prudentiæ conspicuo diademate dicatur coronata.

Quâ Prudentiæ gubernatricis prærogatiuâ, licet se dignissimam, quantumuis exquisitissimis honoribus præstiterit LVDOVICA: est tamen adhuc singulare aliud & eximium, quo supra humana omnia altius euolauit. Illa illa animi inconcussa constantia, in secunda fortuna moderatio, in aduersa serenitas, in vtrâq; victoria: illa supra omnem mortalitatis turbinem, eleuata mentis magnitudo, quæ per omnem omnino ætatem, tot rerum vicissitudinibus circumactam, tot procellis iactatam, tot successuum sinistrè fluentium casibus afflictam, impulit, depreßit, nunquam tamen oppressit Ludouicam. Quale & quantum Cælites spectaculum habuistis; cum infracto inter tot tumultus animo, cum omnia sæui turbines quaterent, portum in pectore inueniret Ludouica Nostra: & ibi haberet quietem, vbi ingentia robora, proceræ Cedri, nequaquam impetu vehementi incurrentibus ventis, procellosisq; Aquilonibus resistebant. Quàm placidus ille fuit animus, qui inter sanguinolentas scenas, quarum vltimus erat actus, interire; totam vim acerbioris fortunæ miti patientiâ exarmabat. Inferebat nobis ab Oriente homo amentissimus, atq; omnibus consilijs præceps, & deuius bellum cum exercitu suo, supra omnem immanitatem barbariemq; cruentum, tetrum, sceleraturn, superis, hominibusq; inuisum. Aduolabat ad Lithuaniam, & Russiam, luctu, lamentis, vastationibus implendam, ardens odio hostili Moschus. Inflammatus pristinis simultatibus, excitatus dulci prædæ illicio, à Septemtrione Suecus, id moliebatur, vt hæc omnia perturbaret, euerteret, diuitias Regni, causam belli putaret, fortunas nostras partim dissiparet, partim distribueret parricidis. Ne quis angulus nobis vacuus esset, à Meridie fædam secum trahebat colluuiem Transylvanus, & quâcunq; ibat, omnia horridis vstionibus deformabat. In ipsâ Patriâ, cuncta plena odiorum, plena discordiarum, plena licentiæ, plena teterrimæ confusionis prospiciebantur. Stetit tamen in hoc impetu insanientis, & obuia quæuis sine discrimine raptantis Fortunæ, inconcussa Ludouica Nostra: interq; durissimas ærumnas, & optimam conscientiam posita, tanquam arbor altissimis defixa radicibus, nullâ vi labefactari, nullis iniurijs loco poterat dimoueri. Ausa est tentare propinquius fortuna, contorsit potentissimum telum, dum binam prolem vnicum Regnatricis domus

delici-

delicium, desideratissimum nobis Iagellonij Sanguinis traducem, publicæ felicitatis optatissimum pignus, acerbo, quia præcipiti fato, terris ostensum tantum, crudeli Libitinæ falce, peremit succiditq;. Fuit hoc procul dubio in ipsa præcordia immissum telum, quod robustissimas etiam, vi suâ mentes prosterneret, in Regali præsertim Domo, in quâ orbitates, inter summa infortunia computantur; liberi calête communium plausuum fremitu spectantur. Nam vt doctissimus loquitur Casiodorus: quodam modo ipse putatur viuere, cuius nobis progenies cognoscitur imperare. Tulit etiam hunc gurgitem, hanc voraginē priuati publiciq; luctus, compositissimâ mente; & ne Mater improlis esset, Rem publicam tanquam dulcissimam filiam, in suas curas adoptauit. Estne aliquod in amplissimo Fortunæ armamentario calamitatis experimentum, quo inuicta Ludouicæ constantia exerceatur. Inueniet, inueniet cæca Dea, implacabile vulnus, quod Palladis etiam perundat scutum, quod omnem Atlantæi animi pertinaciam confringat: nam cum per tot difficultatum luctamina, & horrentes periculorum salebras, immeritum caput circumduxerit: adhuc ne in amplissimo quidem & spatiosissimo Regno, securum relinquet Maiestati locum, & in alienas Terras vi procellarum abreptos, prudentissimos Reipublicæ nostræ Rectores eijciet, & geminas has nostræ salutis aras, deportatas è patrijs locis, peregrinis in Regionibus collocabit. O spectaculum illud non modò hominibus, sed vndis ipsis, & surdis littoribus luctuosum; cedere è Patria Seruatores eius, optimos Principes: manere in Patria perditores: desæuire furentium hostium conatum & audaciam: non posse tutò consistere lumina & decora Poloniæ; quæ ita conseruanda erant, vt illud signum Romanis cælo delapsum Vestæ custodijs continebatur. Volitare impunè aris & focus omnium nostrum, immò ipsi naturæ & humanitati inimicos, qui omnia Diuorum hominumq; iura, nouis inexpriablebus sceleribus fœdauerant: excludi per violentiâ, qui toties nos admirabili grauitate, constantiâ, magnitudine animi, formidolosus Reipublicæ temporibus confirmârunt. Hic verò vastus ille calamitatis fuit Oceanus, cuius exitum, cum ne prospicere quidem miseri possemus, non modò suspiria, sed vota etiam ipsa, quorum maxima libertas est, ex desperatione intermisimus; & quemadmodum illi, quos lubricû in sublimi aliquo, & pendentis scopulo, fefellit vestigium; cum in præceps toto corpore feruntur: videntq; vltimum sibi adesse periculum: obluetari vltrà desinunt, manibusq; proiectis, committunt se suo casui; sic nos in illâ nostrâ extremâ infelicitate, discriminibus amplius decumanis repugnare, rem cōatus non humani cernētes, vltrò iponteq; nos malis nostris tradidimus, illisq; succumbere visi sumus. Neque tamen concidit etiam in tanto circa se periclitantium tumultu: supra omnem calamitatis molem efferebat se altiùs; de suo periculo sollicita, solabatur alios, & capaci cæli animo, supra occasum

Patriæ, in ortum magnanimæ ascendebat spei. Locauit fiduciam in Deo suo, & in se grassantē Fortunā, vmbone fortitudinis propellebat: Altissimorum montium vmbra, mobilibus fluuijs impendentes, spectamus in hoc veluti vndarum folio, suā Maiestate consistere, semper in eodem, & semper in alio. Nam subtrahentibus se, quæ substernuntur aquis, aliæ atque aliæ continuò succedunt; & stant in tantā fragilis elementi rapiditate. Non dispari modo Serenissimæ Reginae heroica constantia, per tot reciprocantes fortunæ iactata fluctus, inter lapsus hominum & rerum, suo se pondere, in lubricā calamitatum crystallo sustentabat: eademq; semper in diuersis rerum mutationibus apparebat. Vnum adhuc restabat telum, quo omnis fortunæ pharetra penit⁹ exhauriretur, vt quæ toties cum Fortunā, tam prospero duello contendere non ignorabat: ipsa tandem sub iura mortis traheretur. Sed quæ semper & vincere & victoriā vti sciebat Ludouica, ne hîc quidem superari se passa fuit. Didicerat, vt erat animo, ad difficilia quæq; percipienda tenacissimo, sic esse vnumquemq; diem aspiciendum, tanquam vel vltimus esse posset. Altè combiberat animo, eum qui Diuinā imperia libens exciperet, nihil debere facere, quod nolit. Itaq; sic animum composuit suum, vt quod concepit cogitatione, idem exprimeret opere; semperq; parata esset exire è vita, semper finem suum sine tristitiā cogitaret. Impresserat felicissimæ recordationi, per has mortalis vitæ angustias, illi meliori longiori; præludi: per hoc spatium, quod ab infantiā patet, in senectutem, nos in alium maturescere partum. Reuocauit igitur ad vsum, quod memoriæ infixum hæsit, & lubens libensq; supremam excepit necessitatem. Instante etenim decretoriā illā horā, quæ latura sententiam, de omnibus suis annis esset: cū & tenerrimo sensu pietatis, Deo suo per crebram Eucharistici panis sumptionem, sese coniunxisset: supremas tabulas placidissimè composuisset, iniuriarum omnium sibi illatarum recordationem, deponere se ex animo confirmasset: diuortium cum corpore fecit; & æternitatem, inter crebros amantis Conditoris suum animæ gemitus, desideriaq; vehementia inchoauit. Heu lingua quomodo tantam Poloniae iacturam protulisti. Re-crudesce iterū post tot clades nouissime dolor, indue pullatum & feralem colorem eloquentia; oculos in terram simul & mærorem deijce, crinibusq; disiectis, quod solenne est, in magno funere, lamentare. Eheu Ludouica, lux Poloniae & Mater, sæculi nostri gloria, suauitas, elegantia, in cuius humanitatis gremio circumactum multis calamitatibus componebamus caput; cuius vitam, felicitatem nostram putabamus; eam nobis subito incumbere calamitatem, vt cū tibi vitam, libertatem, focos, magnā ex parte debeamus, omnes te vidui ac orbi deferamus. Non quidem querimus immatura virtuti tuæ funera: iam enim in primo æui tui flore maturue-

tas, nisi te exorata Numina diu terris commodassent. Sed queri-
mur in te extinctam Religionis zelosissimam Propugnatricem, tem-
plorum magnificam fundatricem, miserorum promptissimam auxilia-
tricem, pupillorum & orphanorum munificentissimam benefactricem,
virtutum omnium tenacissimam obseruatricem: immò querimur in
te amissam Matrem Patriæ, Matrem bonorum omnium, Matrem pu-
blicæ securitatis, quam tuâ salute antiquiorem habuisti, quam tantis
impendijs quæsiuisti. Non lugemus ereptam te nobis, quæ pridem
velut rutilum sydus cælo debebaris: sed lugemus ereptos in te pul-
cerrimos labores, pietatem constantiam, lenitatem, bonitatem, co-
mitatem, liberalitatem, magnanimitatem, munificentiam, quibus
Polonicam hanc Andromedam, Fortunâ & opibus olim florentissi-
mam, nunc magnis fluctibus & monstris expositam, liberaisti, ex-
soluisti, defendisti. Non gemimus immortalem illum spiritum, à
nobis translatum, virtutibus tanquam alis subuectum, in ipsum cæli
domicilium euolasse. Sed gemimus perijsse nobis in te moderatio-
nis delubrum, domicilium prudentiæ, constantiæ arcem, humanita-
tis penu, mansuetudinis sacrarium, & vno verbo virtutum thesaurum.
Sed iam quandoquidem immortalis Deo placuit Ludouicam terrâ
maiores, & humana supergressam, in cælum recipere, consistat tan-
dem intra orbitam suam acerb⁹ dolor, nec mouendum quod in ada-
mante Superi descripserunt. Recipiat hoc illustre excellentis natu-
ræ Terra depositū, & vt sydera solent, parumper obnubilatū, clari⁹
in altissimâ cæli plagâ emerfurum. Tu verò mærens Lechia, quæ su-
premi Regis ante solium, has benignissimæ Principi Ducis exequias,
temperato tibi in diluuiο mæroris, alioque signo tuam in Seruatricem
gratitudinem exhibeto. Commemorant Historici, quorum calamis,
vt suus virtuti honor habeatur, sæculorum obliuio debellatur: Tyrios
olim, cū de Rege creando consilium inijsent, hanc ad extremū in-
uenisse Regni deferendi rationem, vt is qui die insequenti solem vi-
disset orientem, primus Rex ab omnibus salutaretur. Nec mora; pro-
cedentibus omnibus in campum, versis in Orientem oculis, ingenio-
sissimus aliquis Strato, solus in Occidentem prospectabat, editisq; cul-
minibus vr̄bis, radiantem fulgorem solis ostendit, cū illi vt ipsum So-
lē aspicerent, frustra expectarent. Idem à te Polonia mea, Serenissima
Regina Lvdovica cupit vsurpari. Occubuit illa, sed velut cæleste lu-
men, in ipso Occidente mortis, gratissimos virtutum splendores spar-
gens, & è confusis crassiq; dimissa humanorum tenebris, ad planam,
& liquidam Diuinorum venit lucem. Hæc ergo virtutum claritas &
amplitudo, ne in tua vnquam occidat recordatione: poscit à te tan-
quam mercedem omniū vigiliarum suarum, quibus tot per annos tu-
is vulneribus medebatur. Vigeat in memoriâ sæculorum omnium, &
eius nomen tuis sermonibus celebretur per orbem, vt extingui nullâ

vnquam vetustate possit; per quam te tibi redditam gratularis, cui debes ne diuturno tuo luctu, hostium in te licentia redundaret. Fruatur hoc solatio defuncta, vt quoniam continuo in Patriam meritorum tractu, vitam extendit suam, in vastissimas ætatum myriades, eius gloriose virtutis fama prorogetur. Stet illi in tuorum pectoribus, hæc Corona Radiata, Pietatis virtute, tanquã auri splendore exornata; Prudentiæ varietate, tanquam vermiculato gemmarum emblemate distincta; Constantiæ soliditate tanquam perenni fulcimento roborata: vt feri quondam Nepotes, videntes non trabibus aut saxis inscriptum, LVDOVICÆ nomen; sed monumentis æternæ laudis consecratum, inter aurei eam sæculi percescant ornamenta. Hoc vnicum est præmium, quod pro suis immortalibus in nos beneficijs, par est à nobis receptura. Nunc verò quia DEO sic iubente, alteri tantum Serenissimorum Principum Nostrorum, rerum salus, Patriæ tutela, omnium regimen & cura incumbit: æquum est nos pro eo supremi Numinis aris, supplices aduolui, & fausta quæuis apprecari.

Æterne DEVS, vnice huius Regni Vindex, Stator, Defensor, serua nobis Principem, quem rerum nostrarum vices miseratus, & præuidens mala, quæ flagitijs nostris poscentibus, denso in nos agmine eruptura erant, in ipsa tua iustissimâ seueritate, tanquam vnicum remedium, præsidium, solatium; immò defensorem, Assertorem, Parentem nobis prouidisti. Non noua vota concipimus. Tu enim iam tunc eum, in tutelam tuam libens lubensq; recepisti, cum tot hostium insidijs, velut audissimis leonum faucibus eripuisti. Tuo ille auxilio, omnibus suis inimicis excelsior, inconcussus stetit. Tuis æternum prædicandis successibus, ex tantis euasit difficultatibus, in quibus sublimes & proceri gigantes hausti interirent. Quo maiore fiduciã iisdem illis votis, quæ pro se nuncupari iubet, oramus atq; obsecramus, vt non prius plenus altis laudibus, plenus triumphis, plenus illustrissimis victoriarum trophæis, æternitatis Capitolium ingrediatur; quàm exstirpatis Schismaticæ contumaciæ erroribus, attritis domesticæ prauitatis moliminibus, protecto à barbarorum incursionibus Regno, comparatâ legibus reuerentiâ, inductâ aureæ pacistranquillitate, hostium perdomitâ peruicaciâ, Prouincijs omni bonorum affluentia cumulatâ, templis Religione adornatis, vtrumq; mundi cardinem, suarum laudum gloriosis præconijs peruagatus, nomen suum ad posteros transmittat immortale., DIXI.

*Sumptibus, ex Fundatione perpetuâ, Magnifici ac Generosi Dñi,
D. BARTHOLOMÆI NOWODORSKI,
Equitis Melitensis, S. R. M. Rotmagistri, & Com-
mendatoris Posnaniensis.*

BIBLIOTH. UNIV.



JAGELLONICAE

